



特 別
A18
4892
28



八七
4892
28

明詩綜卷八十三



小長蘆 朱彝尊 錄

龍眠 程仕 緝評



慶成宴

靜志居詩話明高皇帝渡江丙午十二月命立郊社吳元年丁未圜丘
方丘社稷壇成圜丘在京城東南正陽門外鍾山之陽方丘在太平門
外鍾山之北社稷壇在宮城之西南洪武元年戊申正月南郊即位是
年十一月冬至祀南郊禮成行慶成禮翼日大宴十年丁巳帝以分祭
天地揆之人情有所未安命舉合祀之典即圜丘舊址為壇而以屋覆
之命名大祀殿十一月始合祀天地于奉天殿詔自今以首春合祀于
南郊十一年戊午十月大祀殿成自是命太常每歲合祭天地于春首
至嘉靖九年因夏言之請改議分祀其詳載嘉靖祀典兩朝樂章詞臣
分撰雜以曲譜合乎雅頌者寡今擇稍典麗者著于編慶成宴樂章十
五年正月定一奏炎精開運之曲再奏皇風之曲三奏眷皇明之曲四
奏天道傳之曲五奏振皇綱之曲六奏金陵之曲
七奏長楊之曲八奏芳醴之曲九奏駕六龍之曲

皇風被八表 熙熙聲教宣 時和景象明 紫宸開繡筵 龍

< 2002-112 >

袞曜朝日金鑪裊祥烟濟濟公與侯被服麗且鮮列坐
侍丹宸罄折在周旋羔豚升華俎玉饌克方圓初筵奏
南風繼歌賡載篇瑤觴欣再舉拜俯禮無愆同樂及斯
辰於皇千萬年 右再奏

周南詠麟趾卷阿歌鳳皇藹藹稱多士為楨振皇綱赫
赫我大明德尊踰漢唐百揆修庶績公輔理陰陽坐令
八紘內熙熙民樂康氣和風雨時田疇見豐穰獻禮過
三爵歡娛良未央 右五奏

長楊曳綠黃鳥和鳴菡萏呈祥日麗風清及時為樂芳
尊在庭管音嘒嘒絲竹泠泠玉振金聲各奏爾能皤皤
國老載勸載懲明德惟馨永保嘉名無已太康哲人是

聽 右七奏

夏王厭芳醴商湯遠色聲聖人示深戒千春垂令名惟
皇登九五玉食保尊榮日昃不遑餐布德延羣生大庖
具豐膳鼎鼐事調烹豈僅資肥甘亦足養遐齡達人悟
茲理恒令五氣平隨時知有節昭哉天道行 右八奏

嘉靖祀典九年七月禮部議覆中允廖道南疏云慶成宴有平定天下
撫安四裔車書會同表正萬邦天命有德五舞又有仰天恩感地德之
曲載于會典或當時
詞臣所撰猶為可觀

太廟時享

詩話太廟時享春以清明夏以端午秋以中元冬以冬至洪武二年正
月定議行之迎神樂奏中和之曲初獻奏壽和之曲武功之舞亞獻奏
豫和之曲文德之舞終獻奏熙和之曲文德
之舞徹饌奏熙和之曲還宮奏安和之曲

慶源發祥世德惟崇致我眇躬開基建功京都之內親

廟在東惟我子孫永懷祖宗氣體則同呼吸相通來格

來崇皇靈顯融

右迎神

承前人之德化家為國母曰子小子基命成績欲報之

德昊天罔極殷勤三獻我心悅懌

右終獻

顯子幽宁神運無跡鸞馭逍遙安其所適其靈在天其

主在室子子孫孫孝思無斁

右還宮

太學釋奠

詩話洪武元年二月以太牢祀先師孔子于國學八月遣官釋奠于先師孔子五年尊孔子封號曰大成至聖文宣王六年八月翰林承旨詹同學士樂韶鳳等上所製釋奠先師孔子樂章迎神奏成和之曲奠帛奏寧和之曲初獻奏安和之曲亞獻奏景和之曲終獻與亞獻同徹饌送神俱奏成和之曲

自生民來誰底其盛維王

嘉靖中勅改師

神明度越前聖案帛具

成禮容斯稱黍稷非馨惟神之聽

右奠帛

大哉聖王

嘉靖中勅改師

寔天生德作樂以崇時祀無斁清醑惟馨嘉牲孔碩薦修神明庶幾昭格

右初獻

百王宗師生民物軌瞻之洋洋神其寧止酌彼金罍惟

清且旨登獻維三於戲成禮

右亞獻終獻

犧象在前豆籩在列以享以薦既芬既潔禮成樂備人

和神悅祭則受福率遵無越

右徹饌

有嚴學宮四方來崇恪恭祀事威儀雖離歆茲惟馨神

馭還復明禋斯畢咸膺百福

右送神

雩祀

詩話嘉靖九年禮臣等議日月令仲夏大雩帝用盛樂春秋左氏傳龍見而雩後世此禮不傳而在位者過早暎之災往往假異端術士祈禱

誣亦甚矣今請於郊兆之旁擇地以為零壇每歲孟夏以後舉行陛下於孟春上辛既祈穀于上帝矣自二月至四月時雨而雨時暘而暘則大雩之祭陛下可免親行遣官代之若其雨澤愆期則陛下躬即其地以行禱祝其作樂陳舞宜仿古昔之儀庶於禮為不失也十一年又進議曰郊以禮為重雩以樂為主合照圜丘樂舞之數以四方之色成樂舞之服庶稱古人感樂皇舞之制兼請三獻禮成之後九奏樂止之時命詞臣撰括雲漢詩詞別製雲門一曲使文武之士青衣執羽竝舞而合歌之乃定議迎神奏中和之曲奠帛奏肅和之曲進俎奏咸和之曲初獻奏壽和之曲亞獻奏景和之曲終獻奏永和之曲徹饌奏凝和之曲送神奏清和之曲望燎奏太和之曲祭畢使道童歌雲門之曲

百川委潤名山出雲愆暘孔熾膏澤斯屯祈年于天載
牲于俎神之格思報以甘雨 右進俎

立春特享武宗

詩話嘉靖十四年二月重修太廟立春特享九廟於武宗迎神奏太和之曲初獻奏壽和之曲亞獻奏豫和之曲終獻奏寧和之曲徹饌奏雍和之曲還宮奏安和之曲

列祖垂統景運重熙於惟武皇昭德勅威用翦除女媧之
大業弗隳專廟以享經禮攸宜俎豆式陳庶幾來思

圜丘

詩話圜丘樂章二首嘉靖初大學士霍韜撰嘉靖祀典不載殆進呈而別用他人之作也

昊天在上我祖在側我奠我幣於焉踧踖昊天在上我
祖在旁我奠我帛於焉皇皇天佑皇祖錫我民祜 右奠帛

巍巍蕩蕩帝德無象無曰無象昭昭在上蕩蕩巍巍帝
德無為無曰無為下式九圍服帝之德朝乾夕惕庶幾
無斃帝心悅懌 右送神

升祔

嘉靖中定

詩話嘉靖十七年七月上興獻王尊謚曰知天守道洪德淵仁寬穆純聖恭儉敬文獻皇帝廟號睿宗九月升祔于廟迎神樂奏太和之曲初獻奏壽和之曲亞獻奏豫和之曲終獻奏寧和之曲徹饌奏雍和之曲送神奏安和之曲皇妣慈孝貞順仁敬誠一安天誕聖獻皇后升祔樂

同章

酌彼鬱鬯玉瓚是將敬哉奉盈有飴其香儼皇祖在上
八聖在旁合享交歆神容洋洋 右初獻

改上成祖謚號

詩話嘉靖十七年九月更太宗文皇帝稱成祖迎神樂奏太和之曲舉冊寶奏熙和之曲初獻奏壽和之曲亞獻奏豫和之曲終獻奏康和之曲徹饌奏永和之曲送神奏安和之曲

高皇謨烈我祖是成誕垂裕于後昆孝孫是徵援奉稽
古薦茲尊稱奕奕闕宮歲事有恒子子孫孫百世其承

右送神樂奏安和之曲

伐倭告祭南郊 嘉靖中撰

天啓有明百神率職殄逆助順無征不克九州奠安維

帝之德載獻載趨既齊既稷

告祭北郊

棗盛既潔齊明是將精誠感通昭格洋洋威稜贊翼我
伐用張邊燧永清海波不揚

詩話魏樂府不成於曹劉而成於繆襲晉樂府不成於潘左張陸而成於傅玄宋樂府不成於鮑謝而成於何承天北齊樂府不成於蕭愨而成於陸印皆屬恨事明洪武樂章率出四學士之筆嘉靖樂章率出議禮諸貴人之詞假孝陵改命伯溫季迪永陵改命稱欽君采則其辭定遠追矣斯考文之盛不若是之懦鈍矣

明詩綜卷八十三

明詩綜卷八十四

宮掖

小長蘆 朱繇尊 錄

弟 繇爵 紆評

郭 愛 一首

愛字善理鳳陽人宣宗聞其才召至京病卒贈

國嬪 顧玄言云貴嬪事見淑秀集其自哀古體源出蔡文姬得性情之正

京邸病革自哀

脩短有數予不足較也生而如夢兮死則覺也先吾親而歸兮獨慚予之不孝也心悽悽而不能已兮是則可悼也

司綵王氏 一首

南海人宣德中女官

顧玄言云司綵宮詞道麗亦椒庭之豔發者

靜志居詩話宮官之設見于周官見于戴記漢魏置貴嬪夫人貴人此仿周官之三夫人也淑妃淑媛淑儀修華修容修儀婕妤容華充華此仿周官之九嬪也北史后妃傳有正華令則修訓曜儀明淑芳華敬婉昭華光正昭寧貞範弘徽和德弘猷茂光明信靜訓曜德廣訓暉範敬訓芳猷婉華明範豔儀暉則敬信此仿周官之二十七世婦也穆光茂德貞懿曜光貞凝光範令儀內範穆閨婉德明婉豔婉妙範暉章敬茂靜肅瓊章穆華慎儀妙儀明懿崇明麗則婉儀彭媛修閑修靜弘慎豔光漪容徽淑秀儀芳婉貞慎明豔真穆修範肅容茂儀英淑弘豔正信凝婉英範懷慎修媛良則瑤章訓成潤儀寧訓淑懿柔則穆儀修禮昭慎貞媛肅閨敬順柔華昭順敬寧明訓弘儀崇敬修承開昭容麗儀開華思柔媛光懷德良媛淑猗茂範良信豔華徽娥肅儀妙則此仿周官之八十一御女也唐宋以來參合損益不廢其名明初定設六局曰尚宮尚儀尚服尚食尚寢尚功掌以宮正總六局之事凡出納文籍皆印署之付內史監牒移于外局有司尚宮之屬有司儀司儀司仗司飾闈尚儀之屬有司籍司樂司贊尚服之屬有司寶司儀司仗司飾尚食之屬有司饌司醞司藥司供尚寢之屬有司設司與司苑司燈尚功之屬有司製司珍司綵司計司綵掌儲藏設疋者也官設于洪武五年王氏家南海河南村永樂二年遷入宮命其權如同輦辭曰妾媵婦也安敢充下陳哉帝重之許歸嗚呼開創之主宮中府中設司分職各有典司后正位乎內夫人嬪御交贊陰教皆有保阿之訓動有環珮之

響內無出閫之言權無私溺之授法至善矣其後宮官罷設奄寺乃得橫行王振汪直劉瑾惡已貫盈至魏忠賢攬政昵一客氏深宮更無為懿安皇后助者雖存女秀才女史官空名恒罰提鈴警夜而宮官大抵皆為奄寺之菜戶矣外而稅礦內而批紅監軍則養寇賊至則開門貽禍之烈一至於此使女官舊章不廢裨衣禴翟絳紗貂蟬雍雍肅肅何遠稱九千歲于大瑞之前乎

宮詞

璠花移入大明宮一樹凝

一作綺旌濃

香倚

一作韻

晚風贏得君丁

留步輦玉簫吹徹月明中

詩話元制歲責高麗貢美女故張光弼輦下曲云宮衣新尚高麗樣方領過腰半臂裁連夜內家爭借看為曾著過御前來楊廉夫元宮詞亦云北幸和林幄殿寬句麗女侍婕妤好官君王自賦昭君曲勅賜琵琶馬上彈明初相沿未改此孝陵有碩妃長陵有權妃也權為高麗光祿卿永均之女善吹簫宮中爭效之寧獻王詩云宮漏已沉參倒影美人猶自學吹簫王司絲亦云贏得君王留步輦玉簫

作妃

沈瓊蓮

七首

瓊蓮字瑩中烏程人弘治初選入掖庭官女學

士

詩話魏有女侍中晉有女尚書迄于唐宋若華姊妹五人皆善屬文昭義節度使李抱貞表薦于朝德宗召入宮試詩賦兼問經史大義深加歎賞不以官妾遇之呼為女學士貞元後宮中記注若華掌之繼而若昭若憲代司其籍烏程女子沈瑩中初入掖庭秦陵試以守宮論發題云甚矣秦之無道也官豈必守哉秦陵大悅擢居第一給事中授女學士吳興人至今呼為女閣老瑩中在大內暇飼白鸚鵡教之誦尚書無逸篇此宜載之管形者也

寄兄

疎明星斗夜闌珊玉貌花容列女官風遞一作度鳳皇天樂

近雪殘一作晴鳩鵲曉樓寒昭儀引駕臨丹宸尚寢熏鑪熱

紫檀肅肅六宮懸象魏春風前殿想鳴鑾

送弟溥試春官

少小離家侍禁闈人間天上兩依稀朝迎鳳輦趨青瑣夕捧鸞書入紫微銀燭燒殘空有夢玉釵敲斷未成歸年年望汝登金籍同補山龍上袞衣

宮詞 五首

翠絲蟠袖紫羅襦偷把黃金小帶輸中使傳宣光祿宴內家學士出新除

青霧濛濛罩碧牕青燈的的燦銀缸內人何處教吹管驚起庭前鶴一雙

豆蔻花封小字緘寄聲千里落雲帆一春從不尋芳去高疊香羅舊賜衫

天子龍樓瞥見妝芙蓉團殿試羅裳水風涼好朝西坐

專把書經教小王

明牕棊几淨爐熏閒閱仙書小篆文晝永簾垂春寂寂

碧桃花映石榴裙

范氏一首

清江人一云新淦 梓孫女早寡選入禁中偶題画寄

意高后見之封為夫人遣還鄉

詩話明初識字婦女得舉女秀才入尚功局萬載縣志載縣民赦用敬妻易淵碧洪武二十六年舉女秀才以疾還鄉又中都左衛千戶陳泰圓妻龍玉英孀居亦舉女秀才洪熙元年封大樂賢母范氏殆其選也

題老嫗騎牛吹笛圖

玉環賜死馬嵬坡出塞昭君怨更多爭似阿婆牛背穩

笛中吹出太平歌

曹靜照 六首

靜照字月士宛平人泰昌元年選良家女入宮

李自成犯關隨內監劉至南京開剃為尼

宮詞 六首

到面東風只自知燕花牌子手中持椒房領得金龍紙

勅寫先皇御製詩

一樹寒花冒雪開幽香寂寂映樓臺女官爭簇傳呼近

知是鸞宮選侍來

寶妝雲髻躡金衣嬌小丰姿倚玉扉新入未諳宮禁事

低頭先拜段純妃

口勅傳宣幸玉熙樂工先候九龍池裝成傀儡新番戲

盡日開簾看水嬉

閱遍司農水旱書君王減膳復齋居御廚阿監新承旨

明日羹湯不進魚

儉德慈恩上古稀他方織錦盡停機赭黃御服重經澣

內直才人著布衣

詩話諸詩見紅蕉集其云泰昌元年選良家入宮按慶陵在位祇一月實錄所載禮儀房長隨董國用將宮女趙永祿等八口發其親戚領去於時魏給事應嘉疏言怨女出宮古來盛德之事自穆廟至先帝兩朝凡五十餘年矣其間侍從宮人空閒無職何啻千萬數人情垂老倍思其鄉即此一事不必問有例無例慨然獨斷施行則仁慈無極言雖未見行然不聞有選良家女子之事當再考之故老野史

宋蕙湘

一首

蕙湘南京宮女年十四遭掠

題汲縣壁

風動江空鼓鼓催降旗颺颺鳳城開將軍戰死君王繫
薄命紅顏馬上來

明詩綜卷八十四

明詩綜卷八十五

宗潢

小長蘆 朱彝尊 錄

西菴 顧以安 緝評

秦藩 二人

朱敬鏞 一首

敬鏞字季量秦愍王棧八世孫有自吟亭詩草

靜志居詩話季量詩太淺率曩富平李孔德曾以秦藩二詩集見貽久乃失去不復再覩當更訪之

江邨雨夜

驟雨連山黑荒邨夜色侵瀟瀟霑暗壁颯颯動秋林江
鴈濕難度草蟲寒更吟愁人當此夕寂寞倍關心

朱誼斗 四首

誼斗字子斗秦愍王九世孫有集

詩話子斗才情橫溢極為富平李孔德所稱覽其祀竈千一百二十十字雖未悉工而浩渺不可及也

雜詩

敬器不受盈橐籥出以虛持是律吾躬可以例卷舒澡
髮奉嚴訓兼受詩與書砥礪慎立節鄉里流歎譽世變
觸駭浪時窮遁荒墟昔為桂與蘭今為櫟與樗昔出擁
高蓋今行無柴車舊交零落盡羸老隨樵漁里正肆搜
括唾面不敢除內省雖不疚旁觀嗤賤愚倦焉顧墳墓
不忍捐此軀強顏留續息不絕將焉如

冬日開元寺訪子新茂之不遇

世變僧猶在城崩寺尚存終傷游客少益信法王尊欲

當天垂暮重霾地轉昏無緣逢二妙愴怳返荒邨

祀竈詩

旅食隨遷次僑居傍酒壚饕餮資釜甑炊爨立庖廚曲
突焦埃墨橫牕黯垢污水妃臨正位火德稟神符五祀
由三代諸卿暨大夫精禋煩祝史側媚矧亡俘臘月驚
春早溫風感歲徂幸存恒跼躅申禱敢踟躕汛掃勞箕
帚香燈照墜塗主人虔跽拜子姓儼奔趨白犢何年有
黃羊此地無豚肩虧博碩菟臄潤彫枯奠薦先陘竈尊
崇復奧隅硬錫黏簠簋瑣果冒盤盂裸地宜如在登天
諒不誣赫烟騰阜蓋烈燄走駢駒謁帝攀金陛朝元集
絳都奏章通太乙關請浼靈巫昭格惟聲響微情竊覲

覬干戈逢喪亂墳墓幾榛蕪樵采悲翁仲椎埋泣湛盧
孫階馴稚犬子舍保童烏日日牀邊筆年年戶左弧空
齋留破硯寒食酌芳壺別有深祈願因之切歎吁壹戎
初底定百揆待匡扶庶窺台鼎將軍戀鼓枹武功勤
遠略文教未全敷僞俗澆淳朴訛言狃誑諛問閭驅罔
象闌闔竄於菟怪蝎歎冰過妖蛟挾浪麗颶颶來廣漠
雷雨墊平塗麥豆餘萁蔓樓臺毀墁圻劇聞填漉灞幸
不到江湖嶺嶠雖枝葉邦畿實榦株北辰當紫禁南極
邈蒼梧鄭使終歸晉山公豈患吳城階聞羽籥府藏朽
彤弧持戟頻逃伍探丸賸有徒殘邨憑賂免完堡受兵
屠城郭稀鳶鵲郊垆沸螻蛄風黃馳響馬月黑嘯封狐

濟濟寧多士盈盈燦麗姝巧鬟垂項領彈帽綴珊瑚章
句深穿鑿衣裳侈僭踰彩毫矜不律繡裾壓諸于廢壟
招屯種新畬怕責租瘡痍兼稊稗脂髓怯錙銖隱沒棲
丘貉飄飄泛水鳧市魁爭狡獪里正肆揶揄是事誰爲
宰斯民望愈孤中央甦混沌倏忽謝鑽刳號慟投鉞斲
神通返體膚至仁迴浩蕩大智用模糊輿蓋還高下圓
方備楷模一元調玉燭七政順璇樞化育殷亭毒形生
盡息蘇真官辭旭殿恩詔下雲衢黃雀酬陰隙金雞宥
罪辜八風推鉅鞫二氣湊鈞爐民物更鎔鑄人才誕聖
儒九重陪舜禹六合際唐虞勲伐追伊傅文章襲典謨
經綸恢寓縣禮樂耀寰區簾業銷鋒鏑艤洗舳艫匝

瀛躬稼穡率土罷徵輸雪夜輕收蔡炎荒薄渡瀘蕭牆
安鄴郅社稷定顓臾比屋擔珪組吞舟決網眾吳禽歸
翡翠越樹却珊瑚嘉運爭寧謚彝倫罔斃渝孔懷諧伯
仲好合共妻孥朋類堅膠漆姻聯託柿柎過庭承對問
入里應歌呼機杼家家錦勸耰處處珠醴移甘井水飴
變苦原茶綠濺沉浮蟻青乾子母蚨中州囚猓豸北海
放駒駟鴛鴦重銜籙龜龍再啓圖君臣交警戒朝野洽
歡娛粟帛兼頒賚鐘鏞畢賜醑千秋亨大有萬國信中
孚婺婦憂忘緯終軍慨棄繻請纓傷耄老攬鏡媿蒼鬚
不忍懷迷寶深愁厠濫芋向空書咄咄凌險視瞿瞿蓬
堵慚今我瓜田守故吾無能安碗礫何計出崎嶇司命

如瞪目迷魂似隕軀依稀聞咐囑叱叱戒誇訐忌諱時
難觸嫌疑世所拘挈耕他自哲躍治爾何愚足繭防跬
跌脣緘慎囁嚅耐寒饒契闊獻歲在斯須更始邀光寵
維新就快愉權宜綏福履次第啐屠蘇涸轍喚窮鮒歆
巢哺好雛探環驚了了啼牖聽呱呱華表晨歸鶴松門
夜訴語漸添丁熾盛全滅涕沾濡道苑行舒轡詞場且
弄觚晤談來勝侶傲睨狂奴譽聞身文繡哦吟口秦
芻但擠佳興致莫恨久衰癯恍若施鍼石幡然已痛痛
引吭餐沆瀣透頂灌醍醐溷澤開融面陽林坼凍跌鶯
花催爛熳紅紫雜縈紆哀樂情非異飛潛迹固殊密雲
懸沛澤其雨斷斜晡霜戟休酣戰曦車弭迅驅會留三

舍景未照及桑榆

題旅舍

空有千金意難酬一飯恩再來逢漂母不復念王孫

周藩 五人

朱安泐 二首

安泐周定王構玄孫

夏夜寄懷謝山人時客汾陽

良夜孤清賞懷君倍黯然客星一以別明月幾回圓紫
寒雲邊樹青山雨後天相思何處寫隨意有冰絃

送李子和山人遊西蜀

諭蜀文誰著風流漢長卿欲投巴于國定向錦官城羸

馬衝山色哀猿雜樹聲武侯遺廟在瞻謁重含情

朱睦㮮 三首

睦㮮字灌甫號西亭周定王六世孫萬曆初舉

宗正有陂上集

錢受之云灌甫受禮于睢陽許先三月而盡其學年二十通五經中年築室陂之上取古人

經解繕寫藏弄敘而傳之先是海內藏書富者惟江都葛氏章丘李氏灌甫傾貲購之竭四十年之力徵唐人四部法用牙籤識別凡一萬二千五百六十卷起萬卷堂諷誦其中泚亡之後漂蕩于洪流怒濤可勝歎哉外周藩睦橫有三業詩藁又勤此南渚朝燿崇岡朝葦近岡皆有集

詩話西亭以好客聞藏書為海內第一世所傳萬卷堂書目不列卷數撰人非故籍也子家藏有聚樂堂藝文志四冊俱詳列卷數撰人係陂上鈔本曩孫侍郎耳伯筮仕祥符從西亭子竹居交契借鈔經解頗多今其撰述十存一二而已

送舜符

疇昔慕游遨與君數朝夕稍申初服懷共結沉冥跡促

明詩紀卷八十五
五
膝究微言披情閱仙籍盼睐恣丘樊留連眷泉石星霜
歛云變婉變成離析撫景念夙懽即事興今戚末路誰
能同素心不可易淒淒冬日黃渺渺寒流碧暫舍故園
林遠適京華陌時有北風來因聲慰岑寂

送鄭處士信之還歛因憶同游諸君子

同調日云稀憐君復遠違青山雙屐在白首一帆歸野
燒浮殘雨寒林散夕暉因茲憶疇昔相對各沾衣

荅田六深甫鄭二信之過陂上

豈是譚經所真成載酒廬竹停仙客騎花醫孝廉車乘
燭驚山鳥調琴出浦魚悠然對孤嶼宛在水中居

朱睦橫 一首

睦橫字仁菴周定王六世孫輔國中尉其子勤
此輯其詩及已作下及孫朝壘題曰三業集

送春

風吹飛絮點池蘋無那傷春又送春試上驛樓高處望
落花無主更愁人

朱勤炘 二首

勤炘號南渚睦橫子封奉國將軍

學仙

學仙貴養氣舉世少其真放之彌六合返則在吾身日
月卒有毀藥石寧足珍非吾好妖妄但爲知者陳巖穴
亦多誤不獨朝市人

朱仙鎮岳王祠

未遂黃龍飲金牌止渡河艱難終奉詔痛哭乃迴戈三字翻成獄千秋尚輓歌不知廊廟計何苦但求和

朱朝壙 一首

朝壙字汝升號崇岡勤此子

郊居雜興

杏花漠漠柳參參路出隋隄十里南一夜水深三十尺朝來網罟集深潭

齊藩 二人

朱慶槩 一首

慶槩字仲望高皇帝第七子博封于齊建文元

年廢為庶人永樂初復封四年奪爵安置廬州

子孫俱為庶人散居南京慶槩有籜冠集 王元美云王孫

詩能直寫胸臆不剽襲人自合古轍

秋日送李文仲訪友新安

正值悲搖落那堪送客舟白雲江上晚紅樹驛邊秋細雨潤琴幔涼風添酒籌逢迎有知己暇日即登樓

朱承綵 一首

承綵字國華齊王孫

錢受之云萬曆才閩人謝維翰白門新

皆與焉國華高帝子孫於今為庶獨以文采風流厚自標置掉鞅詩壇當甲辰中秋海內名士張幼于輩會于金陵授簡賦詩者百二十人伎女馬湘蘭以下四十人縑文墨理絃歌承平盛事白下人至今豔稱之國華詩殊清拔

送茅平仲

置酒長干路譚深夜未闌山川牽恨遠風雨逼年殘天
迴孤帆沒江空獨雁寒從茲君別去月共幾時看

魯藩 二人

朱觀燠 二首

觀燠字中立鉅野僖順王玄孫封鎮國中尉有
濟美堂橐

詩話中立好為詩雖格調卑卑亦復自
善嘗輯山東諸家詩曰海岳靈秀集

趙康王哀詞

帝子東平侶浮名夢已殘叢臺春色冷澗水舊盟寒
散誰彈劔花飛自繞闌茫茫天地外何處駕青鸞
送毛教授還山

未老思投老欲歸便得歸緇塵今漸遠不上芟荷衣

朱頤塚 四首

頤塚魯荒王檀七世孫封鎮國中尉

登兗州城樓

步上西城樓北望傷我心秋風吹大陸落日薊門陰
霜被寒渚白鴈號中林孤飛何栖止嗷嗷悲不禁怵惕
結心曲歸寫丘中琴朱絃感人意悽然發哀音中夜不
能寐撫桐獨沉吟

寄懷邢子愿侍御

相憶未相識高名空復聞時因薊北鴈一望濟南雲
謝傳青山屐羊欣白練裙風流誰可再千載獨夫君

賦得為我彈鳴琴贈王生

憐君多雅調為我彈鳴琴曠矣丘中賞兼之物外心夜
深山鬼泣江淨水龍吟曲罷無人解松風披素襟

蟋蟀

蟋蟀關何事哀音入夜偏寥寥間永漏切切亂鳴絃乍
逐微風斷還從疎雨連閨中有思婦怪爾不成眠

遼藩

朱術均一首

術均字均焉簡王植七世孫輔國中尉換授鎮

江通判遷戶部主事有綦組堂集

詩話明初舊典宗室子不與內外銓除後因御史李日宣等所請援祖訓換授之法言皇族宜通仕籍得旨允行寧王孫子斗詩為屬人本至

公立法無頗偏大訓手自訂百度何森然郡王有孫子所司驗才賢換授準任用外轉遵常銓諒哉二柱史抗章排拘擊先帝蒞科日今皇命試官椅桐委斷壑被以朱絲絃蒞驅在外殿策以珊瑚鞭蓋紀其事也天啓辛酉晉藩慶成濕穆王表桐之曾孫慎恭始舉辛酉山西鄉試明年壬戌賜同進士出身除中書科中書舍人歷精膳主事至崇禎戊辰寧藩瑞昌王孫統鈺由進士改庶吉士累官南國子祭酒自後甲戌則蜀藩奉節寧藩統鈺謀璋子也丁丑則寧藩統鈺鑲庚辰則周藩朝壘在卸寧藩統鈺癸未則代藩鼎娑廷壻寧藩統鈺議汗皆以宗支取甲科而均焉得授鎮江通判其官戶部陝西司主事曾名對平臺奏請仍設漕運總兵而思陵不允也後賊既陷秦廷臣有撤寧遠守關門之議思陵心動以問羣臣矣太常麟徵昌言撤之便而輔臣陳演力持不可而止使關門有備而漕運有兵互相聲援何至巨寇如入無人之境哉然則均焉所對亦曲突徙薪之一策也均焉詩多至數千首率爾而成不費持擇元夕詞結句與白傅歌舞屏風花障上幾時曾画白頭人同一愴已

元夕詞

春風如箭月如梭良夜匆匆瞥眼過聽到衆中喧笑處
老年人少少年多

寧藩 七人

朱多燬 二首

多燬字宗良寧獻王六世孫封鎮國中尉有朱

宗良集 錢受之云宗良鴻聲亮節朱郎之雋

詩話宗良佳句頗多如關山曉月趨三輔鴻雁秋霜度九河太室出雲來苑裏黃河如帶挂城頭路經軒后臨戎坂山接高歡避暑宮格調高華惜全詩未見

雨

觸石陰霞北嶺遙逗風寒雨入簷飄天涯故舊惟孤枕
篋裏衣裳祇敝貂綻雪蘆花紛歷歷經霜楓葉莽蕭蕭
還應撼郭濤聲急只怪空江上夜潮

塞下曲

平明飛騎扣關門漢將新收吐谷渾從此天山傳白羽
不教公主嫁烏孫

朱多炆 八首

多炆字貞吉寧獻王六世孫封奉國將軍卒後
私謚曰清敏先生有勸游橐

詩話貞吉與從兄多燬用晦並有詩名用晦與金德甫交契王元美入之續五子之列然其詩無足觀不若貞吉之有爽氣也貞吉好游變姓名為來相如蹤跡遍吳越間其子謀輝亦效之變姓名曰來鯤字子魚出游吳楚有集行世臨川湯若士為之序所傳溪樓連夜雪山縣隔年春其警句也

送蔡氏

為別既不易贈言良獨難小人各自媚君子乃憂歎投
漆必以膠合椒必以蘭于其寧爾心失意古所安

十四夜玩月

玉繩界西陸澄空淨如澣庭柯泣零露早見圓景滿悄
焉增永懷頓令衣帶緩四氣無終極人生一何短心悲
雍門操淚隕山陽管徂謝子山丘悽其我華館臨觴慘
不怡憂來莫能款

龍沙

龍沙駐蹕地皇祖紀南征草昧君臣定壺漿父老迎平
臨章貢水遠視灌嬰城今古雄圖在低徊落照明

對雨

苦雨何曾歇愁陰暗不開春寒緜氏嶺雲暮楚王臺戲
水飢鳶過寨簾濕燕來靜看雙屐齒無事長莓苔

別胡雲從

故侶三年隔離懷一醉銷烟花桃葉渡春草豫章橋末
路難爲別名山許見招天涯惟有夢相逐往來潮

張敘甫園中牡丹作千花賦此賞之

暮春之初天氣新日日銜杯誰主賓石家錦幃四十里
漢闕粉黛三千人清絲急管巧相聒伏雨闌風橫見陳
繁華狼籍且如此不醉恐礙花神嗔

寄黎君寔司訓

君才不薄廣文官依舊青瑣一片寒冢近郵筒傳自數
地偏書籍借應難懷人夜雨蘼蕪草留客春風苜蓿盤
聞道出游堪累月祇餘山色滿吟鞍

泊長蕩

兼葭一望暮蒼蒼長蕩湖頭烟水長怪道今朝楓葉盡
夜來七十二橋霜

朱多燠 一首

多燠字知白寧惠王第四子石城恭靖王奠堵
之玄孫

詩話南昌郭外有龍光寺萬曆乙卯二月豫章詩人結社于斯宗子與
者十人知白之外則宜春王孫謀劉文翰瑞昌王孫謀雅彥叔石城土
孫謀堉鬱儀謀圭禹錫謀銜誠父謀堉藩甫謀壑辟疆建安王孫謀穀
更生謀聖禹卿謀劉緝其詩曰龍光社草郡人都察院右都御史掌工
部尚書事徐作汝念刑部
主事張壽朋冲齋序之

秋日社集

躡步出郭門涼沙朗朝日迤邐入叢林花宮眩丹漆巍

魏豫章臺萬木四排比音必從白香山讀高讌集友于討論及刊

述清風吹素襟古調和瑤瑟會心豈在遠快意亦多術

遥睇天際帆翩翩若風乙

朱謀璋 四首

謀璋字鬱儀寧獻王七世孫以中尉攝石城王

府事既卒豫章人士私謚貞靜先生有枳園近

橐雷元亮云鬱儀古體出入漢晉温厚典則近體頡頏初盛高渾雄
麗而又弘之以典籍參之以多聞足以名家 錢受之云王孫瑾
戶讀書博通羣籍絕綺紈鮮腆之奉
著書百十二種可比西京之劉向

楊計部曙字載商甕漢壺千里相餉短篇志謝

古陶出古丘閎深容斗許駁犖繡土花不知幾寒暑使
君河北來載以入東楚欣然脫相贈何異獲鐘呂謂予

古人風因之代縞紵豈無珠玉珍雅志非其所摩挲三
歎息高誼誰當侶真彼圖史間春秋惟爾汝

送黃貞父入覲

脂車秣良駟冠蓋如雲浮駕言趨上京述職遵諸侯王
事既有程肅肅塗路修及茲正元初奉璋覲宸旒君抱
廊廟資高視徧九州出兼卓魯聲入與夔龍游翔螭作
時雨膏澤布陵丘壇石百里城豈足長淹留揆予慕高
義夢想託綢繆賦詩申素衷踈踏翰墨儔清風播蘭蕙
令德樹千秋願崇華岱尊黃髮長優游

送姚龍文還永嘉

百卉懷芬芳當春欣所觀時風和且柔好鳥鳴其間萬
彙何熙熙我思獨盤桓良友當遠別惜此會面難握手
臨郊衢一往莫可攀願得少須臾言笑暫爲歡毋金玉
爾音慰我遲暮顏

燕至

芳草無數綠雜花相間紅誰將雙燕至一一舞春風

朱謀晉 五首

謀晉字康侯更字公退寧獻王七世孫有羔鴈

淹留蕪城中車四集

錢受之云王孫詩旨婉約有唐溫許宋
范陸之流風 姚園客云康侯詩如雨

斷山青霞催月出清冷之中每成豔境
又云南昌王孫多稱詩而康侯拔出

客秦郵呈別閻使君

淮田三歲潦民已半爲魚日下司農檄星馳使者車市

烟初寂寂鄉夢亦蘧蘧刺史今元結瘡痍可漸舒

甲寅春日江村即事 三首

水市沙墟地更偏卑棲無用買山錢荒廚慣乞漁家火
行李時登估客船鐵柱江聲連野郭香爐雲氣隔湖天
游蹤到處堪經月豈待男婚女嫁年

綠水園亭白版扉輪蹄出郭到應稀江雷乍殷龍兒長
社日初晴燕子飛飯熟東田觀午饑酒香西舍典春衣
長堤何處無芳草莫怨山中客未歸

江邨負郭坂田多田舍風光草樹和孤鳥立殘牛背雨
小魚吹散鴨頭波買山忽被高僧笑擊壤閒聽老父歌
猶幸代耕餘薄祿門無胥吏夜催科

寄賀文湛持入東閣

焚魚學士最清華五世承恩太史家歸沐不言溫室樹
入朝時草內廷麻吳中舊宅卑依市都下新堤淺築沙
儻爲故人炊脫粟青門來種邵平瓜

朱謀塏 一首

謀塏字藩甫寧藩石城王孫

九日誠甫宗侯招登明遠樓讌集分韻得無字

有約登高興不殊天涯朋好接歡娛寒生南浦楓初落
秋入東籬菊尚無詩派西江存大雅賓筵左顧敕中廚
風前剩有參軍帽醉後終須倩客扶

朱謀圭 一首

謀圭字禹錫石城王孫

秋日龍沙社集

結駟城外游眷此郊原靜崎嶇陟龍沙悠然見西嶺風
日暢幽懷烟光澹雲影松門初地開清磬出禪境黃菊
籬下繁紅芙蓉木末冷心目既雙清和歌荅佳景擾擾塵
埜中真樂誰其領

瀋藩 六人

朱恬爍 一首

恬爍號振菴沁水莊和王仲子封鎮國將軍

李時

遠云振菴詩圓

熟動合矩矱

詩話振菴五言入格如雲迎芝蓋轉花傷藥欄開寒葉飛官
路霜風滿驛樓香雲飛貝葉法雨下天花不失為初唐人語

送吳平川判府致政歸桐城

歸路東風晚悽心向夕烟青山相送日白首倦游年人
渡春江上帆飛暮雨前知君投老去生事在林泉

朱恬爍 一首

恬爍號達菴沁水莊和王叔子封鎮國將軍有

達菴集

李時遠云達菴古詩近
體有韋柳風致

感遇

候蟲鳴虛堂明月照高樹佳人不我過相思隔雲路人
生無百齡奄忽若朝露努力求功名名成髮已素窮通
各有時達人守天賦

朱瑛 一首

理炤字純甫恬爍子封輔國將軍有玉田集

李時

遠云玉田近體爽朗瑰奇

長信怨

永巷風偏入深宮月易斜空牀愁獨守中夜起長嗟託
意題團扇驚心見落花思君情不極惆悵減容華

朱理圻 一首

理圻字崇甫恬爍子封輔國將軍有玉澗集

李時

遠云玉澗諸體皆備簡遠華麗兼而有之

芳樹

嘉樹晝芳菲重重在春苑風來翠幄褰日映朱簾卷嫩
萼正葳蕤柔枝亦繾綣不惜與君攀無令歲華晚

朱理圻 一首

理圻字京甫恬煇子封輔國將軍有玉林集

再逢友人

道遠頻馳夢情深祇寄書相逢俱淚下翻似別離初

朱效錫 一首

效錫字馴甫封奉國將軍有壺峰集

夏日讌伯王園

避暑梁王苑樓深翠竹間風生三徑爽日映八牕關作
賦依芳沼開尊對遠山中林容小阮醉後未言還

唐藩 二人

朱碩燭 二首

明詩總卷八十五
碩爚字孔炎唐定王極五世孫封鎮國中尉有
南陽集

詩話南陽公子博雅工文
所為詩頗饒錢劉風致

送王山人游楚

門前楊柳樹風亂麴塵絲日暮臨溪別春帆適楚時人
烟揚子渡山木偃王祠處處生芳草悠悠千里思

邵山人子俊見過話游梁事

有客擔簦過草堂一尊風雨話游梁鴈池寂寞芙蓉冷
逢著行人說孝王

朱器封 一首

器封字子厚碩爚子有巢園集

詩話子厚入兪州四十
子之列而集不見傳

游仙

劉安守天廁彼乃赤帝精左右在帝側翱翔排玉京
雲蔽丹巘五鳳啾啾鳴石階秀朱草餌之可長生舉手
謝人世爾曹等蒼蠅

益藩 一人

朱常法 一首

常法字幼良益端王四世孫

古怨

妾思亂如絲纏絲無斷絕難將摻摻手解得心中結

明詩綜卷八十五

明詩綜卷八十六

閨門

小長蘆 朱彝尊 錄

南屏 吳焯 緝評

靜志居詩話婦人詩集始於顏竣殷淳爰有徐陵李康成玉臺之編蔡省風瑤池之詠代加甄綜韋穀才調集輯閨秀一卷末元以降選家類不見遺明則麗琬之彤管遺編張之象之彤管新編田藝衡之詩女史劉之汾之翠樓集俞憲之淑秀集周履靖之宮閨詩選鄭琰之名媛彙編梅鼎祚之女士集青泥蓮花記姚旅之露書潘之恒之巨史趙問奇之古今女史元名子池上客之名媛璣囊竹浦蘇氏之臙脂璣蘭陵鄒氏之紅蕉集江邦申之玉臺文苑方維儀之宮閨詩史沈宜修之伊人思季嫻之閨秀集其文亦云富矣然青黃雜揉真贋交錯近濟南王考功士祿悉從考正為然脂集發凡起例有要

郭貞順 一首

貞順潮陽周伯玉妻明初師下嶺南指揮俞良輔征諸寨之未服者貞順從伯玉居溪頭寨作

詩上之良輔覽詩大喜一寨得全

上俞將軍

將軍開國之武臣早附鳳翼攀龍鱗烟雲慘淡遍九野
半夜捧出扶桑輪前年引兵下南粵眼底羣雄盡流血
馬蹄帶得淮河冰灑向江南作晴雪潮陽僻在南海濱
十載不斷干戈塵客星移處萬里外天子亦念遐方民
將軍高名邁千古五千健兒猛如虎輕裘緩轡踏地來
不減襄陽晉羊祜此時特奉明主恩金印斗大龜龍紋
大開藩衛制方面期以忠義酬明君宣威布德民大悅
把菜一笠誰敢奪黃犢春耕萬隴雲龍夜卧千秋月
去歲壺陽戍守時下車愛民如愛兒壺山蒼蒼壺水碧

父老至今歌詠之欲為將軍紀勳績天家自有如椽筆
願屬壺民歌太平磨厓勒盡韓山石

張紅橋 一首

紅橋閩縣人膳部林鴻外室

遺林鴻

一南一北似飄蓬妾意君心恨不同他日歸來也無益
夜臺應少繫書鴻

田娟娟 一首

娟娟工部郎木涇元經之室

慰元經

碧玉杯中琥珀光燈前把勸阮家郎不須苦憶人間世

萬樹桃花即故鄉

孟淑卿 一首

淑卿蘇州人訓導孟澄之女自號荆山居士

徐昌穀云

淑卿詩零落已多其傳者直欲與文姬羽仙輩爭長顧玄言云荆山居士之論謂作詩貴脫凡化質閨人不可有鉛粉氣覽其詩果然魚玄

題画

嶺樹盤雲上溪迴路轉斜晚來烟靄合何處問山家

陳懿德 一首

懿德長興人移居仁和南康知府陳敏政之女

嫁同縣李昂

景泰甲戌進士

官至右副都御史

顧玄言云夫人詩集頗富句如

深院雪消芳草綠小園風過落梅多情致幽絕足為女郎之秀

閩山道中

行盡山蹊路渺茫幾家茅屋對斜陽引泉竹溜穿廚入
墮粉松花遶舍香樵徑無人閒卧犢石田初雨漸分秧
平生頗有山林癖欲向溪邊結草堂

朱妙端 四首

妙端字仲嫻號靜菴海寧人尚寶卿朱祚女光

澤教諭周濟妻有靜菴集

顧玄言云靜菴離落見梅詩可憐不過知音賞零落殘香對野

人或譏其以所配非偶形諸吟詠予讀其鶴賦云何美人之見獲遂羈絡于軒墀蒙主人之過愛聊隱迹而栖遲斯可謂怨而不怒矣咏虞姬云貞魂化作原頭草不逐東風入漢郊何其詞義之烈烈也

詩話靜菴詩頗流麗于歸之後移家海鹽故淑秀集明詩粹明詩妙絕俱作海鹽人

白紵詞

西風蕭蕭天雨霜
館娃宮深更漏長
銀臺絳蠟何煌煌
笙歌勸酒催華觴
美人起舞雪滿堂
清歌宛轉飛雕梁
君王沉醉樂未央
臺前月落天蒼蒼

方維儀云雖乏新奇而句句鏗鏘

客中偶成

異鄉久為客
風雨阻歸程
兩岸數峰碧
孤舟一羽輕
篷牕殘燭在
烟樹早鴉鳴
坐待東方曙
依稀見海城

周青士云極似

郭良曉行之作

竹枝詞 二首

西子湖頭賣酒家
春風搖曳酒旗斜
行人沽酒唱歌去
踏碎滿隄山杏花
橫塘秋老藕花殘
兩兩吳姬蕩漿還
驚起鴛鴦不成浴

翩翩飛過白蘋灘

馮銀 一首

銀字汝白瓊山人
教諭源之女歸同邑唐繼祖
有孝行

詩話汝白讀顏子簞瓢陋巷舍書起而作曰吾雖居陋巷朝焉命僕以耕則有餘食矣暮焉督婢而織則有餘衣矣暇與子觀書則有餘樂矣吾其與顏氏之子同儕哉臨高王同知佐為志其墓稱其幾于知道云

暮春

綠暗紅稀春已深
嬾聽杜宇喚歸音
凋榮何限人間事
獨倚篷牕數過禽

鄒賽貞 一首

賽貞當塗人贈監察御史謙之女翰林編修濮

韶之母封孺人有士齋集

潘景升云孺人詩文端嚴典雅惜幼之所習長之所從皆在首

若齋中未免

涉寒酸氣

詩話士齋女嫁費文憲公

其詩甚庸都無林下風致

中秋有懷

銀漢無聲夜夜清良宵忽感宦游情東山遙望人千里
想亦停杯對月明

潘氏 二首

氏台州人山東副使潘應昌女貢士裘致中之
妻自號碧天道人有碧天道人存橐

水亭

園亭當水中兩岸蘆花沒夜久人未眠碧水蕩秋月

秋詞

翻翻黃葉落西風月滿池亭秋夜空黃菊酒香人已醉
白蘋江冷渡飛鴻

茅氏 一首

氏太倉衛人陸震之母

賣宅

壁有蒼苔甃有塵家園一旦屬西鄰傷心畏見門前柳
明日相看是路人

顧玄言云寡婦賣宅之作志尚端嚴

王素娥 一首

素娥號槩齋紹興山陰人歸部吏胡節節死不
嫁

渡錢塘

風微月落早潮平江國新晴喜不勝試看小舟輕似葉

載將山色過西陵

顧言云
思朗致新

陸娟一首

娟華亭人陸德蘊之女馬龍妻

代父送人還新安

津亭楊柳碧毵毵人立東風酒半酣萬點落花舟一葉
載將春色到江南

儲氏一首

氏泰州人大學士瓘女嫁興化舉人成學

雨後

天桃灼灼倚牕前春色繽紛帶紫烟昨夜雨聲來枕上
惜花人醒不曾眠

屈安人 三首

安人華陰人總督漕運右副都御史直之女嫁
參議朝邑韓邦靖封安人有集

詩話安人早慧十齡刺繡聞父訓諸子盡得其解尋令賦詩悉合獲度其詩康德涵序之

登江樓

登高樓了見西風吹水之潺湲水東去以不回予客思
歸其何年

送夫入覲

君往燕山去棄妾雒水旁雒水向東流妾魂隨飛揚丈

夫輕離別壯志在四方努力事明主肯為兒女傷君有
雙親老垂白坐高堂晨昏妾定省喜懼君自量珍重復
珍重丁寧須記將既為遠別去飲余手中觴莫辭手中
觴為君整行裝陽關歌欲斷柳條絲更長

述懷

自注是歲弟之燕妹歸
商親在華下余居渭北

浙浙北風起蕭蕭木葉稀寒花愁更發鴻鴈獨南飛秋
入商山裏天長渭水西思歸歸未得悵望淚沾衣

馬間卿 一首

間卿字芷居上元人少卿陳沂繼室封安人有

芷居集

苦雨

終日雨翻盆愁人欲斷魂嶺雲生屋角野水沒籬根楊
葉藏深徑梨花靜掩門聲聲偏入耳寂寞自朝昏

黃安人 二首

安人遂寧人黃簡肅珂之女修撰楊慎之繼室

封安人

王元美云夫人寄外之作用修答和皆不及也 陳卧子
云其調雖別自是成章 高寓公云夫人是詩才情殊勝

特嫌韻重陽字首句不如以湘字易之 郎士元送李敖

詩云莫信潮湘書不到年年秋雁過巴東亦有本也

詩話美人娟娟隔秋水杜子美句也其雨怨朝陽阮嗣宗句也黃魯直

寄蘇和仲詩用之曰美人美人隔秋水其雨其雨怨朝陽楊夫人復用

魯直語寄用修正陸平

寄夫

鴈飛曾不到衡陽錦字何由寄永昌三春花柳妾薄命
六詔風烟君斷腸日歸日歸愁歲暮其雨其雨怨朝陽

相憐空有刀環約何日金雞下夜郎

方維儀云不繼不庸格老氣逸

寄升菴

懶把音書寄日邊別離經歲又經年郎君自是無歸計

何處青山不杜鵑

李玉英 一首

玉英錦衣衛人

詩話正德中錦衣衛千戶順天李雄西征陣沒遺孤五人子二曰承祖曰亞奴女三曰桂英曰玉英曰桃英諸子皆前妻所產惟亞奴後妻焦氏生焦欲圖親兒繼襲雄死令承祖往戰場尋父骸骨覲其陷于非命而承祖竟抱骨以歸焦乃鳩死承祖支解而埋之又以桂英鬻豪家為婢玉英頗知典籍年十六伶仃窮迫作送春詩云云又作別燕詩云新巢泥滿舊巢欹泥滿疎簾欲掩遲愁對呢喃終一別畫堂依舊主人非焦指詩詞謂有外通等情俾舅焦榕執送錦衣衛誣以姦淫不孝擬凌遲嘉靖四年夏差太監審錄罪囚凡有冤枉人冤許行陳奏于是玉英具本託其妹桃英齎奏訟冤疏畧云臣年十二遇皇上嗣位遍選才人府尹以臣應選禮部憫臣孤弱未諳侍御發臣寧家臣年十六伶仃無

倚是以濫形吟咏感諸身心寄諸筆札蓋有不得已而為言者奈何母恩雖廣勿察臣衷但玩詩詞以為外通拿送錦衣衛本官誣臣姦淫不孝擬劓罪臣在獄日久有欺臣孤弱而與不良之心者臣撫膺大慟獄中莫不驚惶臣素不才鄰里何無糾舉乃以數句之詩尋風捉影陷臣死罪臣不敢言凱風有詩臣當自責陛下俯察臣情將臣詩句付有司委罪臣不敢言凱風有詩臣當自責陛下俯察臣情將臣詩句付有司委勘有無淫姦寔情推詳臣母之心盡在不言之表則臣亡父母之靈亦可慰于地下矣有旨命三法司會勘焦氏論斬玉英著錦衣衛選良才作配焉按玉英二詩本無關涉而緹帥乃坐以極刑由是推之冤獄難以悉數矣

送春

柴門寂寂鎖殘春滿地榆錢不療貧雲鬢霞裳伴泥土
野花何似一愁人

端淑卿 一首

淑卿當塗人教諭端廷弼女儒官芮儒之妻有

綠牕詩橐

章元禮云淑卿詩曰醇而節和瀾瀾有致

隋柳

煬帝宮中柳凋零幾度秋
蟬聲悲故國鶯語怨荒丘
行殿基仍在空江水自流行
人休折盡春日更生愁

斗孃一首

斗孃松江女子嫁姚生

詩話斗孃送夫之
詩見沈津吏隱錄

送夫

遠逐風塵路遺書滿目愁
思君不成寐河畔看牽牛

沈潤卿云語
意清雅

毛鈺龍一首

鈺龍麻城人雲南按察僉事鳳韶之女嫁少保

劉天和孫守蒙夫死誓不踰閩鄉人稱曰文貞

夫人

詩話節婦奉姑樓居不廢吟咏年七十九日無見猶使甥輩讀之句如
桃花暮雨烟中閣燕子春風月下樓詩句怕題新節序淚痕多染舊衣
裳讀之哀動頑豔

鏡

樣出秦宮製團團寶月迴
虛空開物象心迹遠塵埃影
覆香羅帕光生碧玉臺
繡囊鴛鳥竝珍重嫁時裁

于太夫人劉氏一首

氏穀城人嫁府同知于玘文定公慎行母也

故城

暮雲深鎖故城春
綠樹蒼烟舊白蘋
昔日高樓雙燕子

定巢無處往來頻

楊文儷 三首

文儷仁和人工部員外應獬女餘姚孫陞繼室
封夫人詩附見家集

詩話孫文恪初娶于韓後娶于楊諸子登進士榜者四人太保吏部尚
書清簡公鏞文中禮部尚書鋌文和太僕卿鏞文秉兵部尚書鏞文融
皆楊夫人教之示文融詩云何待三遷教傳經有父兄蓋謙辭也夫人
精帖括斷決不爽相傳文融會試後錄其文呈母夫人笑曰淡墨雖書
第一未免鬻筆似魚非文之絕品
也或言夫人有驕年過百齡云

秋日懷親

玉露沾花濕金風入幕涼天連秋水碧山帶晚烟蒼撫
景嗟時序懷親憶故鄉倚闌凝佇久心逐鴈南翔

采蓮女

邪溪采蓮女日出蕩輕橈慣識溪中路歌聲入画橋

聞徵瓦氏兵至

傳聞瓦氏勇超羣萬里徵來淨寇氛多少材官屯海畔
策勲翻仗女將軍

顧氏 一首

氏崑山人顧茂儉之妹皇甫子循之甥嫁孫僉

事為婦 何元訓云春日一詩
可置玉臺新咏中

春日

春雨過春城春庭春草生春閨動春思春樹滿春鶯

鄧氏 一首

氏眉山人訓導先健女適敘州戶部郎金寬

寄外

鎮日多愁屢廢餐
閉門獨坐遣應難
庭前別我春猶在
月下懷君春又殘
萬點落花誰著眼
一聲飛鴈獨凭闌
夢回湘簟無消息
更啟前書仔細看

王虞鳳 一首

虞鳳字儀卿候官人有罷繡吟年十七卒

春閨

濃陰柳色罩牕紗
風送鑪烟一縷斜
庭草黃昏隨意綠
子規啼上木蘭花

姜氏 一首

氏新建人廣西右布政使忻嘉靖乙丑進士女孫也嫁諸

生丁立祺

寄文學山居

何必入山深
居然似漢陰
雨殘雲在竹
野曠日平林
負郭多幽事
為農長道心
芸牕開卷罷
多是聽鳴琴

桑貞白 二首

貞白號月牕嘉興人處士周履靖繼室有香奩

詩草

詩話周逸之處士作詩不暇持擇宜其閨人亦然然紙閣蘆簾倡子和女偕隱太平之時亦樂事已

寄遠

日暮登樓強自歌
陌頭楊柳望中多
思君書劔天涯客
三月春光有幾何

春日即事

雨晴春暖百花香
戲蝶游蜂各自忙
也擬東郊踏青去
門前流水又斜陽

董少玉 二首

少玉麻城周弘禴繼室有集

戚雲雁云少玉詩居然唐調
王元美云少玉詩清

潤婉秀往往發於情而止於義有不盡為閨閣所束者
方維儀云夫人詩詞均有韻致

憶別 二首

憶別河橋柳青青
送馬蹄妾心與羌笛無日不遼西
驛路花將發離亭柳漫垂
凭闌無一事日日數歸期

屠瑤瑟 一首

瑤瑟字湘靈鄞人禮部隆女年二十而夭

子夜歌

子夜夜轉長簾前
月華吐只解歌調工
誰識歌心苦

沈七襄 一首

七襄宣城人修撰懋學女嫁屠隆子

自君之出矣

自君之出矣孤月鑒虛牖
思君如飛花隨風不回首

袁彤芳 一首

彤芳字履貞吳縣人參政年女自稱廣寒仙客

九日

玉露泣秋草金風凋晚蕖
白衣三徑少黃菊一籬疎
病減登高興愁無寄遠書
遙知二三子相向正愁余

王鳳嫻 一首

鳳嫻松江華亭人解元獻吉之姊知宜春縣張

本嘉萬曆乙未進士之妻有焚餘草

空閨

壁網蛛絲鏡網塵花鈿委地不知春傷心怕見呢喃燕
猶向雕梁覓主人

陸卿子 五首

卿子長洲人尚寶卿師道之女處士趙宦光之
妻夫婦偕隱寒山有雲卧閣考槃玄芝諸集

相逢行

白馬驕青雲金鞭拂紅霧相逢不問名各自東西路

擬陶

閒居寡世用性本忘華簪淥水盈方塘清風來茂林弱
魴戲漣漪野鳥鳴好音日夕時雨來白雲瀾高岑庭草
滌餘滋原野藹飛霖開顏散遙念濁酒聊自斟

陳卧子云不促薄

擬李白古風

重陰翳白日陽和轉淒薄霰雪何紛揉草木盡零落長
風終夜厲棲鳥將焉託游子敝貂裘居人羨藜藿所以
商山翁高舉往巖壑

贈毗陵安美人

去年花發毗陵道美人何處拾瑤草今年草綠姑蘇臺
美人此時花下來風吹羅袂香不定流波蕩漾光徘徊

不逐行雲作飛雨夢裏鉛華學神女坐久烟霞拂袂生
回眸愁向空中舉水遠山長不見君空聞樹上黃鸝語

山居即事

披榛越宿莽背郭隱花蹊月靜妖狐泣松深怪鳥啼秋
山雲照戶春澗水穿堤飛作千尋瀑家家引灌畦

徐媛一首

媛字小淑長洲人范副使允臨之妻有絡緯吟

姚園客云小淑詩文與陸柳子齊名然徐以綺麗勝才情稍遜于陸

別曹孃

木落西風萬壑幽忍將離思為君留碧雞關外淒涼月
偏照蠻雲夜夜秋

文氏一首

氏邠州三水人長沙通判在中之女嫁葛氏早

寡守節力學有君子亭集

詩話節婦為光祿太青之姊寡居作九騷以見志九騷者一曰感往昔
二曰懷湘江三曰望洽陽四曰矢柏舟五曰愀離幃六曰傷落花七曰
臨雲歎八曰待月愁九曰撫玉鏡其辭有云觀扶光之如箭于哀歲月
其難追拾朱英而太息于時不再來悲朱顏其易改寸唯寸心之不衰
辭義俱雅有古人之則

悼懷

青青山上松年華不可考灼灼園中花顏色不常好五
月鳴蜩至八月蝴蝶老感物有盛衰豈忍歸腐草

薄少君一首

少君太倉州人秀才沈承妻

哭夫

水次鱗居接葦蕭賣魚爭米晚來嚙河梁日落行人少
猶望君歸過板橋

姚氏 一首

氏嘉興人自號青峨居士秀水范應宮之妻有

玉鴛閣遺稿

詩話青峨居士詩屠緯真賞其清華流利陳仲醇尤稱之謂肝腸如雪能吟柳絮之詞志節凌霜直擬木蘭之操筆牀茶竈不巾櫛閉戶潛夫寶軸牙籤少鬚髯下帷董子及其卒臺砧哭之慟刊其遺詩及已哀悼倡隨之作傳之鄉里焉

竹枝詞

卓女家臨錦水濱酒旗斜挂樹頭新當爐不獨燒春美
便汲寒漿也醉人

范壹貞 一首

壹貞字淑英一字蓉裳吳縣人嫁吳氏有胡繩

集

烟雨樓圖

烟嵐無限雨中情遠近樓臺一望平吳苑草荒麋鹿走
越江春盡鷓鴣鳴長隄柳樹迷春渚白水菰芡繞郡城
最是晚來新月下萬家燈火隔湖明

黃幼藻 一首

幼藻字漢薦莆田人蘇州府通判議之女林儀

部啓昌之婦有柳絮編

姚園客云幼藻麗才雅藻何減玉臺年未四十而卒臨終猶誦殘燈

無燄影幢幢之句可悲也

題明妃出塞圖

天外邊風掩面沙舉頭何處是中華早知身被丹青誤
但嫁巫山百姓家

梅生一首

生姓梅氏麻城士子周世遴伯玉妻

詩話生有逸才兼工古文辭南昌王于一向予稱之其夫周伯玉赴試
省闈生賦落葉小詩寄之伯玉省詩悽愴不入鎖院而返足以見伉儷
之重矣傳聞生有外行未免蘭形棘心曾填小曲寄情人云假若是淚
珠兒穿得起拚剪下一股青絲穿一穿寄把你于一謂古之喻淚者曰
泣若曰連如曰流泉曰垂露曰連絲曰玉箸曰縷縻曰鉛水曰日南珠
未有道及此者于一好劇譚譚必傾座斯言稍過綫不能穿淚珠本香
爾

寄外

落葉滿庭階秋風吹復起遙憶別離人寂寞何堪此

馬氏一首

氏虎關將家婦有香魂集

詩話莆田宋比玉得馬氏詩集于荒邨老屋中
見芳草無言路不明之句為之擊節錄而傳之

秋閨夢戍詩

夫重封侯愛妾輕漫歎珀枕戀寒更夢回遠戍相尋處
芳草無言路不明

沈紉蘭一首

紉蘭字間靚嘉興人參政黃承昊妻有效顰集

秣陵道中風雨

剔盡寒燈風動幃長途况是客單衣無端燕子磯頭雨
一舫隨人到處飛

吳令則 一首

令則桐城人諭德應賓長女嫁生員何應瓊玉之

憶玉之

春來草色想河關遠道縣縣不可攀翻恨白雲飛去疾夕陽千里露童山

吳令儀 一首

令儀字棣倩令則之妹兵部侍郎方孔炤夫人夜

新月不來燈自明江天獨夜夢頻驚長年自是無歸思未必風波不可行

方孟式 三首

孟式字如耀桐城人大理卿大鎮之女嫁山東布政使張秉文濟南城潰同其夫殉節贈一品夫人有紉蘭閣集

寄任夫人

可怪睽違日相思幾換年故園芳草合南國美人偏生死交難見悲歡意莫宣祇應三五夜明月共君圓

秋興

西風傷往事笑此客中身葉落蒼烟斷花開黃菊新天涯蓬鬢短邊徼羽書頻蟋蟀知秋意階前鳴向人

憶舊

一別江潭月幾圓相憐人面不如前依稀舊日尋芳地
秋雨梧桐十二年

方維儀 六首

維儀桐城人亦大理卿大鎮之女適姚孫祭再
期而夭遂請大歸守志有清芬閣集

詩話龍眠閣多才方吳二門稱盛夫人才尤傑出其詩一洗鉛華歸
于質直以文史當織經尚論古今女士之作編為宮闈詩史分正邪二
集主于昭明彤管刊落淫哇覽者尚其志焉集中句若白日不相照
何況他人心中高樓秋雨時事異時昔何其辭之近乎孟貞曜也

死別離

昔聞生別離不言死別離無論生與死我獨身當之北
風吹枯桑日夜為我悲上視滄浪天下無黃口兒人生
不如死父母泣相持黃鳥各東西秋草亦參差予生何

所為死亦何所辭白日有如此我心徒自知

傷懷

長年依父母中懷多感傷奄忽髮將變空室獨彷徨此
生何蹇劣事事安可詳十七喪其夫十八孤女殤舊居
在東郭新柳暗河梁蕭條下霜雪臺閣起荒涼人世何
不齊天命何不常孤身當自慰且免摧肝腸鷓鴣栖一
枝故巢安可忘

出塞

辭家萬里戍關路隔風烟賦重無餘餉邊荒不種田小
兵知有死貪吏尚求錢倚賴君王福何時唱凱旋
獨歸故閣思母太恭人

故里何須問干戈擾不休家貧空作計賦重轉添愁遠
樹蒼山古荒田白水秋蕭條離膝下欲望淚先流

旅秋聞寇

蟋蟀吟秋戶涼風起暮山衰年逢世亂故國幾時還盜
賊侵南甸軍書下北關生民塗炭盡積血染刀環

楚江懷吳妹茂松閣

空林隕葉暮鳥啼雲水迢迢隔皖谿夜發蒼梧寒夢遠
楚天明月照樓西

方維則一首

維則大理卿大鉉之女嫁生員吳紹忠有茂松閣集

詩話方氏三節一為孟式同夫殉國一為維儀十七而寡壽八十有四
一為維則十六而寡壽亦八十有四白圭無玷苦節可貞足以昭諸管
矣形

題竹

小院何空寂相依獨此君雪深愁易折風急不堪聞白
石移花影青苔擁籀文樓頭明月上空翠落紛紛

姚淑人一首

淑人上虞姚克俊女餘姚黃尊素配

詩話淑人年十六歸忠端當公入為御史與楊左魏李諸公早夜相過
語及羣小陰謀輒形之歎息或至泣下賓退淑人進曰公等不能先事
網繆涕泣何益公曰被逮淑人每夜祈死北辰之下願以身代逆奄就
誅賜章服三品教其子宗義為復社領袖南國諸生顧杲等公許闡黨
阮大鍼宗義名居第三大鍼後柄用中旨逮治淑人喟然曰豈意章妻
滂母萃吾一身山陰劉公宗周嘗熟瞿公式起皆目之曰女師詠扇之
作託物寓意不審關西
惠元孺輩曾見之否

詠蒲扇

世間物性初無定百鍊剛成繞指柔何似萑蒲經織後
能將九夏變三秋

沈宜修 二首

宜修字宛君吳江人山東副使琬之女工部郎
中葉紹素之妻有鸚吹集

感秋

月向中天迴一作人驚秋暮悲玄霜初落後一作客夢未歸

時縹緲三秋鴈蕭條兩鬢絲空餘舊簫管愁對月明吹

仲春寄表妹張倩倩

湖外青山別路長沉吟舊事總堪傷故園明月門前柳

回首春風各斷腸

商景蘭 三首

景蘭字媚生會稽人吏部尚書周祚女祁公彪
佳之配

詩話祁商作配鄉里有金童玉女之目伉儷相重未嘗有妾媵也公懷
沙日夫人年僅四十有二教其二子理孫班孫三女德淵德瓊德蒞及
子婦張德蕙朱德蓉葡萄之樹芍藥之花
題詠幾遍經梅市者望若十二瑤臺焉

送別黃皆令

徵調起驪歌悲風繞坐發人生百歲中強半苦離別念
君客會稽釜不因人熱茲唱歸去辭珮環攜皎月執觴
指河梁愁腸九回折流雲思故鳥鼯鼠懷故穴帆檣日
以遠山川日以越同調自此分誰當和白雪竚立望滄

浪憂來不可絕

關山月

秋月開金鏡浮雲散碧空
風吹榆戍北露濕柳城東
影滿驚門鵲光沉起塞鴻
秦關今夜色應與漢宮同

悼亡

公自垂千古吾猶戀一生
君臣原大節兒女亦人情
折檻生前事遺碑死後名
存亡雖異路貞白本相成

項蘭貞一首

蘭貞字孟婉秀水人貢生黃卯錫之妻有栽雲

月露二草

送外赴試

柳陰輕綰木蘭舟杯酒殷勤動別愁
此去但看江上月清光猶照故園樓

顧若璞一首

若璞字和知錢塘人副使黃汝亨子茂梧之妻
有卧月軒橐

宮詞

垂柳千條拂御墀涼風初到影蛾池
銀箏玉笛花前奏不唱班姬團扇辭

張倩倩一首

倩倩吳江人沈秀才自徵之妻

憶舊

日言終卷八
故人別後杳沉沉，獨上高樓水國陰。
鴻鴈不傳千里一作恨，天涯流落到如今。

書底沈憲英 一首

憲英字惠如，一字蘭友，吳江人。沈自炳長女。

悼宛君姑

樓上春深乳燕來，半簾花影自徘徊。
子規聲裏黃昏月，叫斷東風夢不回。

葉紈紈 四首

紈紈字昭齊，吳江人。葉紹棗之女。歸棗氏有芳。

雪軒遺藁

暮春赴嶺西道中作 二首

故園別後正春殘，陌上鶯花帶淚看。
何處鄉情最悽切，孤舟日暮泊嚴灘。

烟樹重重失故鄉，雲山極目恨偏長。
不知何日是歸日，杜宇聲聲最斷腸。

秋日偶題

一番搖落一番嗟，咫尺天涯夢裏家。
莫道秋來不憔悴，滿庭都是斷腸花。

哭妹

牕花寂寂蕊初寒，誰向簾前握手看。
風景不知人有恨，月明依舊畫闌干。

葉小鸞 二首

明言紀卷八十六
小鸞字瓊章一字瑤期吳江人紹袁季女未嫁
而天有疎香閣遺集

己巳春哭沈六舅母墓下

十載恩難報重泉哭不聞年年春草綠腸斷一孤墳

哭姊

雲散遙天鎖碧岑人間無路月沉沉可憐寒食梨花夜
依舊春風小院深

祁德淵 一首

德淵都御史山陰祁彪佳女嫁姜廷梧桐音

送黃皆令

西風江上鴈初鳴水落寒塘一櫂輕遠徑黃花歸故里

滿堤紅葉送秋聲片帆南浦離愁結古道河梁別思生
此去長塗霜露肅何時雙鯉報柴荆

張德蕙 一首

德蕙字楚纒山陰人諭德元忤之孫嫁祁公子

理孫奕慶

中秋

秋氣中天淨愁人獨夜看停橈江愈闊却扇月初寒霜
入桐陰薄風飄桂影殘扣舷情未已露濕綺羅單

朱德蓉 二首

德蓉字趙璧山陰人太師燮元之孫嫁祁公子

班孫奕喜

送黃皆令

青青楊柳枝飄搖大道旁大道多悲風游子瞻故鄉執
杯送行客淚下沾衣裳憶昔弭遠櫂明月浮景光壺觴
極勝引歌舞開華堂好鳥得其侶舉翼齊翱翔膠漆兩
不解金石安可方分袂起倉卒永夜生嗔傷吳山何渺
渺越水亦茫茫芙蓉被秋渚采采有餘芳願言贈所思
曰歸紉為裳

上巳

桃花新水浣春衣舊日蘭亭到亦稀斷岸羽觴晴日暖
遠山橫笛暮雲飛沙棠舟近江鷗起玳瑁梁空海燕歸
尚有采蘋思未定不堪月色上羅幃

黃修娟 一首

修娟字媚清仁和人參議汝亭女

邨居即事

寂寂邨居晚迢迢旅鴈稀煙花迷曲徑山月澹清輝黃
菊經霜淨秋萼帶雨肥夜深寒漏徹漁火逐星歸

項珮 二首

珮字吹聆秀水人處士吳統持之室有藕花樓

詩彙

詩話吳處士巨手有大宅在北郭之秋溼得吹聆為嘉耦琴瑟靜好詩
篇酬和甚樂也遭亂家破轉徙無定跡糠粃不飽然未嘗聞交謫之言
所題此齋即秋溼故居取方廣胸宇以為曲闌鄉人題詠者紛紛惟
吹聆詩俱從梵夾中出極其嚴帖或疑六字韻書不收然三點成六猶
有想六即伊字苑
舍人或詩可據也

夫子書屋落成闌干皆用卍字遂名曰卍齋屬
賦四十字

夫子愛奇字迴闌繚繞之一時齊作卍三點不成小樹
色春浮竝齋居繡佛宜定知人載酒送喜有芻尼

社日

過雨春泥白斜飛燕尾纖恰停鍼綫坐自起爲鈎簾

翁

桓 一首

桓字少君錢塘人處士胡介妻

重過西湖

風風雨雨鳥空啼草綠山腰水滿隄画閣已傾歌舞散
十年重到六橋西

姚媯俞

一首

媯俞字靈修長洲人嫁嘉定侯演有再生餘事

冬日

坐擁烏皮倚隱囊且翻梵夾靜焚香淒淒庭院悲風急
漠漠江天朔鴈翔一段旅懷還磊落百年心事付蒼茫
登樓望遠迷鄉樹又見寒鴉送夕陽

章有渭

二首

有渭字玉璜華亭人嫁嘉定侯泓有燕喜樓草
舟行即事

曉霧迷離彩鷁輕櫂歌徐動見新晴臨湍鷺子亭亭立
夾岸蒲花漫漫生遙指小山遮塔影忽經深樹出鐘聲

晚涼不覺羅衣薄自愛澄湖片月明

春感

舞蝶莊生夢啼鴉蜀帝魂紫芝逢勝友芳草想王孫小
閣聞雞唱閑庭聽鳥喧曉烟迷麥隴春霧鎖柴門魚戲
青萍動風吹碧葉翻綵毫題玉柱綠蟻引金尊乍摘歲
蕤草長依翡翠軒避秦無絕境何必問花源

盛韞貞

四首

韞貞字靜維華亭人

邨居雜感

三首

自我來茲地重門曉夜高蕭條門外柳幾度向人青采
蕨懷商土占時望歲星但能安病骨不必問池亭

烽火吳關遠烟花谷水明孤墳應宿草白髮隔重城遺
行書難就玄言較未成愁心託幽夢茲夕倍縱橫
蓬徑無人迹春廚斷暮烟稻梁謀自拙僕隸義相捐薄
俗終難入幽棲性自便尺書兼斗粟慙媿主人賢

寄兄

一自雙親盡鄉園不忍旋七年三見面稚子漸齊肩夢
斷燕山月春歸海樹烟書來能念我三復鵲鴿篇

姚

淑

一首

淑字仲淑金陵人庶吉士達州李長祥納為繼
室有鍾山秀才海棠居集

寄研齋太史

年年歎離別此別何時休樓頭望不見從今不上樓無
錢買鯉魚君書何處求

倪仁吉 二首

仁吉字心惠浦江人進士仁楨之女

宮意圖

調入蒼梧斑竹枝瀟湘渺渺水雲思聽來記得華清夜
疎雨銀缸獨坐時

彈琴

梨花小院午風輕謾理冰絲入太清一片梧桐心未死
至今猶發斷腸聲

錢敬淑 一首

敬淑字師令江寧人文學談允謙之妻

泊浦子口

殘年孤櫂泊近浦驗歸程雪圃芹牙白江醪竹葉清夕
陽新別路衰草古離情隔岸寒山色含悽望舊京

湯文玉 一首

文玉

司吾春游詩

山雨初晴洗佛螺春風處處揭青莎采香不倦溪邊路
多少飛紅趁鞦韆

周淑禧 一首

淑禧江陰人周榮公第三女

詩話至元斥賣廣濟庫故書有采畫本草一部近吳中趙凡夫子婦文
傲端容設色畫本艸曲臻其妙江陰周榮公二女淑祐淑禧臨之亦成
絕品淑禧寫大士象一十六幅陳仲醇謂其十指放光直造盧楞伽吳
道子筆墨之外今文倣真蹟尚有存者周氏姊妹花草見者罕矣又石
城女子李侗那善画
水仙則余亦未之見

杜康廟

酃有新糟釀有醅杜康橋上客題詩最憐苦相身為女
千載曾無儀狄祠

詩話海內圖經罕載杜康祠宇獨三吳有之相傳康有遺冢在江陰縣
城南土人因於橋下建祠以劉伶配之季給事科草募疏云詩傳雅詠
先歌既醉之章書有誥辭特謹德將之訓潮麴蘗流傳既遠而古今風
味攸同酒星在天醴泉出地舟中之劑三百市上之價十千爰有飲中
八仙竹林七子或沉或湏孰孰賢緬懷作醴之功豈止忘憂之具今
杜氏之遺橋尚在而劉家之故巷猶存閱歲久而年深為風侵而雨剝
茲欲樹豐碑之七尺翦棘誅茅建祠屋之三楹崇基壘石俾千載相傳
為勝事賴一時共濟以落成文頗流利然不若淑禧一絕之新警也

紀映淮 二首

映淮字阿男金陵人嫁莒州杜氏早寡守節終

絕句

杏花一孤邨流水數間屋夕陽不見人牯牛麥中宿

秦淮柳枝

栖鴉流水點秋光愛此蕭疎樹幾行不與行人縮離別
賦成謝女雪飛香

謝五孃 二首

五孃萬曆中湖州女子有讀月居詩

小園即事

翠竹青梧手自栽芙蓉未秀菊先開小軒睡起日卓午
黃葉滿庭山雨來

感懷

四面簾垂碧玉鈎，重重深院鎖春愁。天涯行客無歸信，花落東風嬾下樓。

曹壽奴 三首

壽奴小字山姑，崇禎間吳興女子，有觀靜齋橐

詩話壽奴詩頗有林下風致，贈姊一篇其源出於楊方。

贈伯姊

草有竝蒂，花木有連理。枝果有合歡，核豆有同根。其魚或比目，游鳥亦比翼。隨同功繭作，縣合登玉爲。厄我與子姊妹，願得不相離。出必同車輪，居必聯屋楹。見月每共拜，弄珠定雙嬉。子妝我掠鬢，子盥我捧匜。我衣禱子砧，子濯汙我私。機張我續織，鏡聽子兼持。子褰我衾裯，我舖子粥糜。寒輒擁子背，暑還扇我肌。子女迭相抱，帷帳恒竝施。生從比肩人，沒以百歲期。

夫君北行以菩提數珠留贈

百八菩提子，紅絲貫小纓。無眠他夜月，留記遠鐘聲。

寄外

去作西湖十日期，經年猶滯謝公池。別來夜夜雙行淚，只有珊瑚舊枕知。

李因 一首

因字是菴，會稽人。一云杭州人。光祿卿葛徵奇之妾，有

竹笑軒吟草續橐。

詩話是菴善画花竹之天斜禽鳥之跳躑具有生動之趣刻沉香為像以奉白陽山人詩其餘事爾然無鉛粉之飾

郊居用松陵集韻

避世牆東住牽船岸上居雨分三徑竹晴曝一牀書上坂驅黃犢臨淵網白魚衡門榛草遍長者莫停車

黃媛貞 四首

媛貞字皆德秀水人先世父貴陽守副室有卧

雲齋詩集

俞右吉云亡友黃鼎平立二妹一字皆德一字皆令均有才名皆德為貴陽朱太守房老深自韜晦世徒盛傳皆令之詩画然皆令青綾步障時時載筆朱門微嫌近風塵之色不若皆德之冰雪淨聰明也

丁卯冬十二月留別妹皆令

北風悽以栗不忍吹羅襟高雲語征鳥離思兩難沉今我遠庭闈與子分芳衾寧忘攜手好所以傷我心一言

一回顧別淚垂不禁但得頻寄書毋使相望深

聽雨

長夜一燈炮獨愁誰與言牕前幾點雨井上芭蕉翻

山邨

春山春水碧依依草屋風輕燕子飛行到半坡亭小住野雲何事亦來歸

貴陽解中

天涯二月早芳菲官舍何曾遠翠微如此溪山堪累月杜鵑猶道不如歸

陸氏 一首

氏華亭夏考功允彞侍妾

追悼

錦瑟蒼涼憶舊蹤
芳年行樂太怱怱
濃香簾幕圖書靜
明月樓臺笑語通
人竝玉壺丘壑裏
才分采筆黛螺中
祇餘華表魂歸去
夜夜星辰夜夜風

徐簡簡

三首

簡簡字文漪嘉興人
休寧吳璵小妻有珮蘭閣
草夢居集

詩話文漪緣情有餘風
格未老然亦閨中之秀

宮詞

二首

沉香亭子玉勾闌
遍植名花按月看
第一莫栽紅芍藥
此花開日定春殘

庭院沉沉盡日扃
自將書法學蘭亭
中官領得芙蓉粉
催入長春寫御屏

寄懷

夾岸垂楊卷落花
春風咫尺是天涯
重門深鎖樓中燕
獨有王孫不在家

江

娥 一首

娥宗室來鯤侍兒年十三能詩

戊戌除夕守歲和王孫作

仙茆筆秃硯成冰
守歲無聊寢復興
柏葉酒香餅已罄
小牕留得隔年燈

朱大韶婢

一首

題壁

無端割愛出深閨猶勝前人換馬時他日相逢莫惆悵
春風吹盡道旁枝

詩話華亭朱吉士大韶嘉靖丁未進士性好藏書尤愛宋時鏤板訪得
吳門舊姓有宋槧素宏後漢紀係陸放翁劉涓溪謝疊山三君手評飾
以古錦玉籤遂以一美婢易之蓋非此不能得也婢臨行時
題詩於壁吉士見詩惋惜未幾捐館予聞之李高士延是云

明詩綜卷八十六

明詩綜卷八十七

中涓

小長蘆 朱彝尊 錄

吳趨 孫起範 緝評

靜志居詩話明制設內書堂以教小內侍用史官四員主之從學者約
四十人其後撥入讀書者多至三百人所以教之者有方矣而三百年
來此輩善詩文者蓋寡予為搜訪僅得六人焉此外若楊友呂憲
戴義李學輩雖間有詩句流傳多不成章雖欲廣之而未得也

龔 輦 二首

輦字中道南昌人弘治中為內官監左丞有沖

虛集 俞汝成云左丞雅事文墨兼尚
理學沖虛一集所謂空谷之音

贈顧潘

與君少小定交游今日相逢兩鬢秋天上風雲真似夢
人間歲月竟如流可憐王粲依劉表不遇常何薦馬周

安得忘機共漁父白蘋洲上數沙鷗

見後猊偶作

聖德彰戎服後猊遠貢將雖然為異物費我大官羊陸咸

一云辭旨温厚

張瑄一首

瑄弘治中內官監太監鎮守廣西

平南烏江道中

山東平川小路斜不成村落兩三家分明橫幅桃源景
只欠溪流泛落花

傅倫一首

倫正德中都知監太監鎮守桂林

題望江亭

山色拂雲青溪光照空碧靜觀元化初超然意自適

王翱一首

翱字鵬起順天通州人嘉靖中選入司禮監讀
書歷御馬監右監丞有禁砌蛩吟

詩話監丞集內猶李蔭于美序之

秋夜有懷

西風吹雨夜蕭蕭客思逢秋倍寂寥十載已虛明主詔
半生徒插侍中貂誰憐季子黃金盡無奈馮唐白髮饒
何日一帆江左去獨尋山水混漁樵

張維二首

維字四維霸州人隆慶初選入伴讀東宮歷乾
清宮管事御馬監太監提督內忠勇營有蒼雪

齋臺

詩話張監丞以善詩稱定陵呼為秀才命掌兵仗局駕幸局觀所造兵
器手翫弄之奏曰兵凶器非至尊所宜操帝笑而止嘗於禁中退食地
植竹數竿定陵題之
曰蒼雪因以名其集

瑤臺霽望

天都五月雨一夜洗層臺日上芙蓉吐鐘鳴樓殿開石
根雲卷盡松頂鶴飛來看盡南巖景筠籃詎忍回

老姥詞

使節從天下崎嶇不計程野花微辨色山鳥未知名仙
姥鍼猶在真人誥已成倚闌探舊跡何處步虛聲

孫隆一首

隆字東瀛三河人萬曆中以太監督織造駐杭
州

題慧因寺

笙歌日日娛西子為愛幽閒到玉岑舊有高人井西宅
沿流且向寺門尋

詩話寺在西湖南五代天成二年吳越武肅王建面玉
岑背兔嶺有箕泉流繞寺門元黃子久曾築室於是

明詩綜卷八十七

明詩綜卷八十八

外臣

小長蘆 朱彝尊 錄

廣陵 張師孔 緝評

吳 徹 一首

徹字文通崇仁人為陳友諒用事嘗偵太祖軍
被獲命詠百馬圖黔其面目為詭譎秀才又賦
西山夜雨詩云云

西山夜雨

莫厭西山夜雨多也應添起洞庭波東風肯與周郎便
直上金陵奏凱歌

周所立 一首

明詩紀卷八十八
所立號盤谷臨江人仕陳友諒為草上梁文晚
就臨江教授

哭定位

綠錦池頭舊使君近傳消息不堪聞的盧竟死檀溪險
鸚鵡翻成鄂土墳蒿葉蕭條生夜月棠陰迢遞起秋雲
陳琳老大頭如雪無復軍前草檄文

靜志居詩話定位字子靜為陳友諒守臨江抗太祖師於鄱陽被殺

饒

介一首

介字介之臨川人元末自翰林應奉出僉江浙
廉訪司事張氏入吳杜門不出自號華蓋山樵
亦曰醉翁士誠慕其名自往造請承制以為淮

南行省參政吳亡俘至京師伏誅

詩話介之在吳延攬名士一時如陳庶子姜羽儀宋仲溫高季迪楊孟載陳維寅維允虞勝伯秦文仲皆與訂交自目為醉樵蓋仕於淮張非本懷也

丁未歲論書贈仲溫

太白流西荒音響一何切蒼精散暘谷光彩爛昭晰靈
氣垂八芒雲漢自茲抉人文既開張象畫亦區別冥機
不自見直待智者發誰能懷遂初心焉悟皇頤閉門工
造車出門即合轍古人有成言得之盡毫髮流形歸自
然萬古字不滅將同造化功豈獨在書訣神哉嶽瀆經
鍊石補天裂

馬玉麟 二首

玉麟海陵人張士誠據吳為參政城破死

虎丘和范文正公韻

綠蕪迷四野空翠擁千巖風過鶴鳴樹雲歸龍在潭雨
花翻寶座積石護僧菴此地如容我移家住水南

又次柳道傳韻

高城落日下樹擁半山青野鳥啼還歇溪雲散復停微
官猶是客對此暫忘形為愛生公石移尊上小亭

張憲 三十二首

憲字思廉紹興山陰人仕張士誠為樞密院都
事吳平後變姓名走杭州寄食報國寺以死有

玉筍生集

劉使君云思廉師事楊廉夫尤多懷古感時之作成化
中安成劉紆序其集曰思廉與鐵崖諸君同為一時能

言之士當元季擾攘志不獲伸才不克售傷時
感物而洩其悲憤于詩可謂思廉之知己也

詩話鐵崖諸弟子才鋒犀利莫過張思廉讀其長歌波瀾橫溢弟子不
必不如師也元季居大都雙橋里有火主簿騎騮馬過之指示思廉曰
能騎此否思廉笑曰虎則不能若馬也吾則能之矣適翰林承旨任開
台從騎三十餘自西而東既過思廉執策就馬足甫及鐙則已奮迅馳
突入翰林隊中羣馬辟易于烟塵中但聞翰林厲聲曰好馬南馳至雙
橋越塹而過俯身就韉韉比及手已馳過樞密院街矣遂縱轡至哈達
門而回主簿訝思廉久不返騎他馬來追于天師菴執手大笑竝轡歸
飲漏下初鼓乃散鐵崖評其走馬歌云決非驢背詩人語洵足異也

琴操

芒芒禹迹兮畫為九州侯伯牧守兮職貢是修其或不
臣兮天討罔偷胡今世兮敵國同舟嗚呼哀哉兮吾誰
與謀

子夜吳聲歌

朱雀街頭雨烏衣巷口風飛來雙燕子不入景陽宮

估客行

二首

發舟石頭城繫舟梅根渚江月夜寥寥照見家人語
割製家書刺指題日月不知何時到但記今朝發

燭龍行

燭龍燭龍汝居陰山之陰大漠之野視爲晝暝爲夜吸
爲冬噓爲夏蛇身人面髮如赭銜珠吐光照天下天地
寬日月小烏兔盤旋行不了窮陰極漠無昏曉汝代天
光補天眇汝乃不知日被黑子遮月爲妖蟞食五緯無
精光萬象盡奪色下民焮莢皆昏惑燭龍燭龍代天職
胡不張爾鬣奮爾翼磨牙礪爪起圖南遍吐神光照南
極補缺免無損傷正畸烏不傾吳妖蟞黑子紛誅殛重

光重輪開萬國胡爲藏頭縮尾窮陰北坐視乾坤黯然
黑乾坤若崩摧吾恐汝龍有神無處匿

夏蓋山石鼓謠

臨平石鼓不自鳴直待蜀桐魚作形陳倉石鼓載文字
徒有鼓形無鼓聲夏蓋之石或自鳴蓋石一鳴三吳兵
嗚呼三吳十年厭干櫓不緣夏蓋鳴石鼓

代魏徵田舍翁詞

有序

鐵崖楊先生以殺田舍翁爲文皇根心語蓋徵
好直諫忤意者數矣是必有弗堪其直者故怒
曰會須殺此田舍翁不覺其言之出口也此則
是也然謂徵東宮臣節之虧故爲太宗所薄而

明言終卷八十八
呼爲田舍翁者此則非也徵能入夢于太宗而不能自明其事故代田舍翁詞補綴諫錄云

臣本山東農臣誠田舍翁臣以隋末亂出仕蒲山公蒲山復諫自用故臣言不用臣計不從百萬糧一日盡百萬衆一夕空力屈事去歸山東臣義不忍棄故土事仇充相隨西來朝真龍先帝不臣識大臣不臣通故臣上書自請安山東山東歸皇圖授臣洗馬之職在東宮東宮多不德兄弟不相容臣教太子翦黑闥親元戎又教太子除陛下太子不臣庸太子既死先帝命臣聽陛下處分臣安敢效匹夫小諒自與逆黨同陛下以臣盡心所事赦臣死罪除臣秘書登臣政府爵位崇臣於是感

激時時進諫開皇衷陛下幸而時聽臣言以致四海太平年穀豐使陛下功德及堯舜則臣心喜小有過失則臣心忡是以不四年中而有三代風陛下初年誠心聽諫故天耳聰今聽諫不逮昔故天耳聾往以未治爲憂故人心悅今以旣治爲安故威德隆往日用臣言賜臣以黃金甕天廡輿殿材構臣屋與墉今日以人言仆臣墓碑停臣子婚爲惠胡不終喜臣則謂臣媿嫉惡臣則詈臣田舍翁陛下不宜以喜怒毀譽損厥躬臣薦侯與杜謂其才略雄臣豈阿黨預知其終凶臣錄諫疏草前後三百封欲使後世知陛下能聽諫致時雍豈欲賣直歸過爲己功避嫌焚草徒足恭臣幸而身先朝露使

臣不幸恐不免隨比干侶龍逢獨不記臣言良與忠胡
為乎會須殺此田舍翁田舍翁豈畏死但惜陛下既殺
張亮又誅劉洎翦刈大臣如刈蓬臣不願陛下祠少牢
立仆石但願陛下養氣質除內訌毋以喜怒存諸胷大
臣無災帝德穹社稷無虞王業鴻千秋萬歲為唐宗老
臣不諱田舍翁於乎老臣不諱田舍翁

聖母神皇詞

東風未燥昭陵土感業尼稱天下母則唐室山河忽變
周李氏兒郎更姓武洛水泱泱出寶圖黃金爛爛鑄天
樞五王不入迎仙院二豎能忘受命符君不見漢家元
后號文母廟食從來姪祀姑

餞梁王

壽春殿延喜樓梁王欲歸天子留樓前百戲俳優優百
官陪宴酬未休梁王上馬樓上頭梁王東歸天子愁天
子愁梁王喜鴟梟暗移傳國璽碭山王氣龍蹤起皇后
捧金卮天子歌柳枝家亡國破無多時楊廉夫曰讀此不覺涕泗橫流恨不剗刃賊臣

以快其心

發白馬

朝發白馬津暮及陳留縣兵事急星火驛程疾雷電左
挾弓右擎箭獨飛一騎報軍書百里王城馳急變丞相
鎮靜材清談白羽扇天子蔽九重張樂絳宵殿內門三
日不得朝咫尺天威意徒戀三十萬眾解兵降錦繡封

明言經卷八十八
六
疆成廣箭明日腥風曠騎來背城借一誰堪戰孽倖竊
魯弓姦諛齋紀甌街壁牽羊事已非束手藩臣忘入援
收淚踏邊塵含悲別宮院回首東南漢月高浙瀝風沙
破顏面白草黃雲望莫窮西樓尚隔湯成淀木葉山前
下馬時青衣始悟降王賤使者來君不見

怯薛行

怯薛兒郎年十八手中弓箭無虛發黃昏偷出齊化門
大王莊前行劫奪通州到城四十里飛馬歸來門未啓
平明立在白玉墀上直不曾違寸晷兩廂巡警不敢疑
留守親姪尚書兒官軍但追上馬賊星夜又差都指揮
指揮宜少止不用移文捕新李賊魁近在王城裏

夜坐吟

蜻蜓頭落燈花黑瓦面寒蟾弄霜色玉壺水動漏聲乾
夜冷蓮籌三十刻蓬頭兒子凍磨墨欲拾羈懷尋不得
起看庭樹響風箏斗杓墮地天盤側

呂梁洪彭越廟

黃河東南奔呂梁屹相向蕭蕭彭王廟淒然據其上空
山藐秋色衰草蔚長望荒烟薄殘陽柔櫓破寒浪彭王
古壯士志節素豪宕徒成百戰功不獲寸土葬哀哉虎
兇軀竟作柘中醬可憐黃金甲采繪泥土像佇想忠壯
魂陰風幾悲悵憂來不忍去駐馬更悽愴

任城道中

日言錄卷之十一
客行魯橋道路出毒山驛驅車上峻坂歇馬道旁石雨
來松樹暗風起荷葉白一笑歎浮生胡為倦行役

冬夜聞雷有感

陽氣渙不收梨花開九月無何玄冬夜火靈飛列缺疾
雷放旬旬大雨久不輟頑雲聚不散淫風赤如血蟲豸
不入藏龍蛇競出穴寒威變融煥四序失故節胡為數
歲中雷向盛冬發委靡不執柄遂為羣陰竊及其不可
忍奮迅始一決乃於涸寒時礮礮未肯歇龍戰久不解
險難紛糾結既乖長養意愈使威權褻天怒不終朝王
綱有時裂何能堯吾君調理繼稷契先事誅權姦以次
及羣孽假爾霹靂車為吾左黃鉞普天新號令坐使萬

國悅煌煌世祖業中道復光烈

自臨安往富春過芝泥嶺示隨行李巡檢

平明升肩輿相與東西征浮嵐翳遠道宛在雲中行連
山互低昂曲折如送迎接天蔽喬木澗與風爭聲前登
芝泥嶺雨意漸覺晴曛曛日色薄蕭瑟衣裳輕畏塗見
鹿角高若屯鄉兵綵旗病目眩嚴鼓羈魂驚憑軾若夢
寐撫髀傷浮生顧謂李飛尉我行猶幾程

臨安道中先寄賽景初

朝入臨安山莫上由拳嶺周道無行蹤晴空斷飛影嚴
關固高柵壘嶂列危屏荒坳斜日淡虛市野烟冷息肩
坐茂樹瞑目發深省何庸一作事馬蹄塵兵鋒迭馳騁

秋日山寨校兵呈同列

露下草木空四山秋色峻起持餓鴟弓習作長蛇陣旅
分貔虎徒翼若鷹隼奮文成牙旣禡血祭鼓亦衅日光
耀旗影霜威肅兵刃翕張更坐作勇怯失退進徐如磨
蟻沿忽若奔馬迅向背月輪偃孤虛斗杓運渭原識諸
葛泚水見韓信雖非勅敵遇敢忘出門慎堂堂固其遏
整整孰敢近哀哀白骨堆纍纍黃金印縱無東可平豈
患西難鎮誰爲人中雄往雪天下憤盡取羈縻域帖然
作州郡

主家貓

主家畜一貓文采玳瑁光晨餐溪魚飽午睡花陰涼營

營溝中鼠白日亢我牀鼠東貓却西所恨不相當一朝
忽相當反爲鼠所戕淋漓兩脣紐跼促四足僵呼奴起
擊鼠鼠去貓倉惶作炊實貓腹割裳裹貓瘡愛貓心雖
仁敗事流毒長所媿主家闇貓鴛庸何傷

白頭母次徐孟岳韻

道旁哀哀白頭母西馬塋上花翁婦數莖短髮不勝簪
百結鶉衣常露股自言夫本業種樹一朝棄業從戎伍
荷戈南征竟不歸不知被殺還被鹵屈指十年音信斷
獨宿孤房誰共語家在錢唐古蕩東門前正壓官橋路
却憶夫在種花時春來桃李下成蹊自從夫死花樹折
錦繡園林成馬埒縱餘梨杏與梅茶無力入城供富家

富家遭兵亦銷歇金錢誰復收名花何況邇來新將相
一體好儉不好奢兵餘城市化村塢亂後名園作軍府
年年寒食杜鵑啼人家上冢西湖西時光荏苒易飄忽
可憐誰拾花翁骨君不見海棠風楊柳雨牢落錦紋箏
凋零金鴈柱黃四孃家客漸稀蛺蝶飛來過牆去

為隱師題林若拙画

阿師堂上生雲霧突兀峰巒起縑素玄雲靨黠濕丹青
積翠爛斑落庭戶漲空嵐起湧波濤噴石寒光飛瀑布
鐘昏烟寺僧未歸澗跨板橋人不渡黃茅幾簇尖頭屋
綠林一帶無根樹茸茸碧蘚雨乍晴恰恰黃鸝春欲暮
新水桃花溪上舟閒亭芳草沙頭路意匠潛移造化機
筆端想有神靈助尚書在昔已擅場弟子如今稱獨步
抵須指画索我題不惜長篇為君賦

贈鐫碑王生歌

太湖之水通吳淞綠波冷浸青芙蓉巨靈神斧斫不去
帝命留與歷代賢聖鐫奇功奇功曠世信希有至德乃
可齊不朽嗟哉王生習此藝功德不逢長袖手虞黃歐
揭牛毛多筆端佞語如懸河銀鈎鐵畫衍奇麗天下匠
石勞礮磨王生手握三寸鋼肥深瘦淺能自量神椎輕
重心應手白螽食鐵森成行詞嚴筆勁逼晉漢學士何
人美詞翰官亭五采護龜趺峙立通衢人不看人不看
恐淚垂晉朝羊公今為誰高山深水苦自置後世誰人

想見之王生王生女當知功德豈在多文辭君不見延陵季子碑上僅十字千載萬載生光輝

青山白雲圖

青山青青白雲白一尺小溪千里隔扁舟艤岸不見人
雞聲何處秦人宅桃花流水春粼粼不識人間有戰塵
待得紫芝如掌大歸來甘作太平民

荅問湖源風土

湖源源上路東與浦陽連地勝藏春塢民居小有天秋
山紅入画晴野白浮烟一道桃花水如今泊戰船

聞說

聞說江城破歸心夢裏驚肺肝從此熟手足近來輕春

事愁花朶晨齋怯鼓聲平生慕王猛今日莫談兵

聽雪齋

萬籟入沉冥坐深牕戶明微于疎竹上時作碎瓊聲撲
紙春蟲亂爬沙夜蟹行袁安政無寐欹枕漏三更

大都即事 二首

三月西山道春風平則門繡鞍紅叱撥羶帽黑昆侖衣
襪分香裹壺餅借火温醉歸楊柳月綠霧掩黃昏
千步廊前月朦朧照御街風簷鳴寶鐸雷板耀金牌城
影平鋪地樓陰半上階誰家吹短調一夜亂春懷

投贈周元帥

玉帳臨江近金城鎮海遙鼓聲秋動地劔氣夜衝霄露

下星河白風高草木凋山寒旗獵獵沙靜馬蕭蕭左廣
初傳駕西船已畏燒五離纔散鼠六博又成梟豪傑乘
時奮賢材早見招紫樞虛上座黃闈待清朝會見擒姦
操歸來醉小喬恩波門外柳長拂富春潮

書憤

離宮金翠化為烟土宇凋零舊幅員豈是相君酣醉日
况逢天子中興年武關兵馬全無信浯水文章久未鐫
白髮詩翁憂帝室長歌泣血拜啼鴉

画扇

渴龍飲清江江水皆倒立風雨滿山來石榭半身濕

湖上

紅杏牆頭粉蝶綠楊牕外黃鸝何處春光最好蹋青人
在蘇隄

陳秀民 五首

秀民字庶子温州人徙居嘉興仕張士誠爲江
浙行中書省參知政事翰林學士有寄亭集

詩話庶子僑居于禾朱漢翔
纂攜李英華集以其詩壓卷

灤陽道中

晨出建德門暮宿居庸關風鳴何蕭蕭月出何團團短
轅駐空野悲笳生夕寒我本吳越人二年客幽燕幽燕
非我鄉而復適烏桓前登桑乾嶺西望太行山太行何
盤盤欲往愁險艱寓形天壤間忽如水上船役役何所

求吾將返林泉

送遠曲

誰令車有輪去年載客西入秦誰令馬有蹄今年載客
過遼西車輪雙馬蹄四念君獨行無近侍婦人由來不
下堂側身西望涕沾裳恨不化為雙玉璫終日和鳴在
君旁

至武岡

家居猶旅食兒子復南征婁縣千江隔都梁百日行鴈
書天外遠馬角夢中生食祿非吾願何時復舊耕

邳州

青山一髮見邳州落日雲迷故國愁父老空傳黃石在

仙人已伴赤松遊乾坤不信無清氣河水胡為尚濁流
野樹昏鴉棲未定數聲哀角起高樓

姑蘇竹枝詞

吳門二月柳如眉誰家女兒歌柳枝歌聲嫋嫋嬌無力
恰如楊柳好腰肢

劉仁本 二首

仁本字德玄天台人元進士歷官江浙省左右
司郎中佐方谷真謀議朱亮祖克温州被獲有

羽庭詩藁

錢受之云方氏盛時招延士大夫折節好文與中吳爭
勝文人遺老如林彬薛都刺輩咸往依焉至正庚子仁

本治師會稽之餘姚州作零詠亭于龍泉左麓仿佛蘭亭景物集名士
趙俶謝理朱右天台僧白雲以下四十二人修禊賦詩仁本自為之敘
焉

續蘭亭會補參軍劉密詩

并序

庚子春仁本治師會稽之餘姚乃相龍泉之左
麓州署之後山得神禹祕圖之處水出巖罅瀦
為方沼疏為流泉卉木叢茂行列紫薇間以竹
篁彷彿乎蘭亭景狀因作零詠亭以表之合甌
越來會之士得四十二人同修楔事取晉人蘭
亭會圖詩缺不足者各占其次補四五言各一
首因曰續蘭亭會云

陽春沐膏澤草木生微暄靈圖發幽祕感此禹迹存衣
冠繼芳集臨流引清樽性情聊自適理亂復奚言

詩話左司結續蘭亭會與者四十二人今名氏未能悉考詩僅存者左
司而外都事謝理補督侍郎謝堯卿貢進士趙倣補參軍孔盛蕭山主

補朱名補餘杭令謝勝帥府都事王霖補王獻之蕭山教諭諸綱補府
曹勞表平江儒學正徐昭文補府主簿后縣祕圖隱者鄭彞補山陰令
虞國嘉興路經歷張溥補鎮國大將軍掾卞迪天台僧自悅補任城呂
系四明僧如阜補任城令呂本東山僧福報補彭城曹評詩皆醇雅絕
類晉人特事在至正庚子後九年始建元
洪武諸君惟倣及右仕明故其詩不悉錄

再往三山

去歲才從上海還今年又復戴南冠榕陰巷陌春風老
荔子樓臺宿雨乾幾處舊游重載酒十年往事一憑欄
回頭却羨天台道有客吹簫跨玉鸞

方行 三首

行字明敏黃巖人谷真子有東軒集

錢受之云宋濂
序曰明敏仕于

元嘗參知政事于江浙行中書省按方谷真據慶元姪明善據溫授江
浙行省平章又有明敏明謙者明敏或其羣從也復見心蒲菴集夜宿
東軒東方明敏大參詩云重來濠上得盤桓翦燭東軒坐夜闌國初元
臣例安置濠見心奉詔伴鳳陽與明敏數倡酬知明敏亦徙濠也沐景

顯滄海遺珠多載國初成漢之詩而明敏與焉知徒濠後又謫真也余之初考如此及觀秦忠徹古今識鑿云方明敏國珍子也柳莊相之曰君邊庭赤氣如刀劔紋二九日有陞進隨從父克太倉授分省參政調江西乃知明敏為谷真之子前元之陞授實以谷真奮于之役而余初考為未詳也素記又云洪武戊午國珍已沒明謙受剝膚之刑舉族累禍則明敏或於此時得以從輕典成漢也洪武實錄載谷真質子曰關曰元後與其子明完明則俱降完小名亞關關即完也宋濂神道碑載子男五人其二則禮與完谷真病亟時授官以慰之者其三曰本則安則未知此五人者孰為明敏者也谷真諸子姪內附前後名字竄改更互不可考覈史家闕誤若此者多矣豈獨祀宋無徵為可歎哉谷真竊據時招延文士薩天錫朱右輩咸往依之劉仁本詹鼎則親近用事潛溪盛稱明敏襟度瀟灑善談名理于書無所不讀古詩俊逸超羣律詩婉麗清切則明敏于國初居然勝流未可以場山遺種而誦之也慶元之父于淮張之兄弟右文好士皆有可書志勝國羣雄者無抑沒焉

題吳彥嘉所藏張秋蟾龍圖

張公畫龍人不識筆法遠自僧繇得挂向高堂神鬼驚
恍忽電光來破壁想當渤海開筆力元氣淋漓浸無極
吞吐日月天地昏摩蕩雲雷太陰黑江翻石轉竒莫測

雪濤卷空銅柱側洞庭扶桑非爾誰顛倒滄溟為窟宅
乃知前圖只數尺坐令萬里起古色何當置我君山湖
上之高峰聽此老翁吹鐵笛

楊柳詞 二首

韶華無限暗中消搖蕩春光幾萬條却怪晚來風定後
雪花飛滿赤欄橋
曲江南陌亂垂烟勾引春風入管絃惆悵幾株憔悴盡
與人長繫別離船

明詩綜卷八十八

明詩綜卷八十九

羽士

小長蘆 朱彞尊 錄

休陽 吳元鉉 緝評

張宇初 八首

宇初字子璿廣信人嗣漢四十二代天師賜號

無為真人有峴泉集

王仲縉云峴泉詩冲邃幽遠篇章翰墨各極精妙 錢受之云宇初五言古詩

意匠深秀有三謝韋柳之遺響唐末以來釋道二家並重明初名僧輩出而道家之有文者宇初一人厥後益寥寥矣 靜志居詩話古今詩僧傳者不少黃冠率寥寥無聞唐惟上官儀吳筠曹唐稍能詩然儀唐皆不終于黃冠則不得以黃冠目之矣惟元時道敎特盛所編五劉譚馬郝王孫七真者大半有集迄于至正如張雨伯雨馬臻志道是皆軼倫之才明初僅張宇初余善二人無戾風雅已爾餘皆卑卑鮮足當詩人之目此外龍虎山人張留紳有詩見臨川胡琰大明鼓吹又黃徵君俞邵編明史藝文志有佘和叔同亭詩院一卷武巨道士張蚩蚩適適吟一卷安仁冲虛山道士 顏服膺潛菴詠物詩六卷訪之未得附載之

擬古

朝陽生東樹微月流西岑清泉活活流好鳥交交吟春
夏氣候殊涼燠自駸尋美人崇蘭佩芳香襲衣襟邈然
與世隔空睇瑤華音蹇修曷爲言感慨投吾簪

養疾

濯足山澗中杖策暝乃還寒蜩鳴疎樹落日下西山灌
園露已濕倦息衡門間窶空非苦疾鶉衣畏早寒寧貽
榮叟諄齒落無衰顏

冬日還峴泉

郊墟物候和野逕抱溪曲言旋白雲岑烟樹澹餘綠淺
瀨引寒流崇巒披秀木荒疇已農穫隱構藏林屋深窟
想兔脫危機絕羝觸毋爲弓旌招靜言抱松菊

題夏山過雨圖

夕雨過涼樹流雲吐層峰橫橋蔓綠翳杖策宜丘中煩
溽意俱滌邈然塵外蹤鍾山豈竟卧清瀨聞高宗

乙亥季夏還山居偶興

未夏熾餘暑幽期諧素衿川源蔽繁綠溪渚澄深潄田
舍靜雞犬荒蹊抱深林圓淵敞靈構疊嶂羅高岑荷氣
薄朝露魚波依重陰披襟遂恬息濯澗清閑心遺世非
塵傲養真宜自任秋風動早思寫我丘中琴

過錢塘

越上曾游地年深感寂寥山光隨浦盡海色共天遙古

剎藏秋樹寒江送暮潮故人渾不見愁緒酒難消

望吳山

吳越游程熟溪平驛路分夕陽回浦樹秋色滿湖雲曲
激船孤放淒風鴈獨聞浣花茅屋小別思夢紛紛

山行晚眺

縱目郊原趣依稀物候新溪寒回返照林暝促歸人山
逕松陰雪漁家柳色春盡拋江海興期此坐垂綸

余善四首

善字復初玉峰清真觀道士

楊廉夫云方外生余善追和張外史游仙詩讀至長

桑樹爛金雞死有客遠牀三叫以為老鐵嘴中語又如一壺天地小於瓜雖老鐵無以著筆矣

追和張外史游仙詩

城闕芙蓉曉未分身騎金虎謁元君青童不道天家近
笑指空中五色雲

溪頭流水飯胡麻曾折瑤林第一花欲識道人藏密處
一壺天地小於瓜

不到麟洲五百年歸來風口尚依然穉龍化作雪衣女
來問東華古玉篇

春宴瑤池日景高烏紗巾上插仙桃長桑樹爛金雞死
一笑黃塵變海濤

席應珍一首

應珍字心齋號子陽子嘗熟人提舉致道觀錢受

之云子陽子嘗居相城靈應觀與沙門道衍為忘形交道衍因師事之衍即姚少師廣孝或云少師兵法半是心齋所傳

題章復画碧桃

憶昔瑤池侍宴時
碧桃花下酒盈卮
今朝醉裏看圖画
羞對東風兩鬢絲

鄧羽 一首

羽南海人明初知青陽縣事後為道士隱居武當之南巖自號松石道人不知所終有觀物吟

絕句

人生天地長如客
何獨鄉關定是家
爭似山翁隨所寓
年年處處看梅花

盧大雅 一首

大雅貴溪人龍虎山道士有石砭樵唱顧玄言云大雅為張

外史所知
定非庸人

舟中寄散木張外史

櫂郎催踏春溪舫
阻我辭君散木亭
江水未應春去漲
鄉山偏向別時青
烟波釣艇新衝雨
河漢仙查舊犯星
輸與仙都吉居士
一簾山雨聽鵝經

周思得 一首

思得字養真別字素菴錢塘人有弘道集俞汝成云真人

扈從成祖北征恩寵甚厚歷事五朝晉秩二品享年九十諭葬賜塋亦古今所希觀者顧玄言云養真羽流高逸被文皇之眷游仙諸詩殊有思致

夢游仙詩

翩翩鶴羽拂重雲
仙樂嘈嘈世未聞
一虎借騎何處去

定應月下訪茅君

林復真 一首

復真字剛伯嘗熟人入龍虎山為道士預修永樂大典歸居致道觀之來雲堂有止菴集

送東白副綱還雲間

三年客裏惜居諸此日功成貝葉書幾度賜衣沾湛露
滿懷歸興載籃輿山橫齊魯吟情好月落秦淮鴈影疎
若過吳門煩問訊故園松竹近何如

章志宗 一首

志宗字清源號逍遙子松溪文昌觀道士有逍遙集

閒述

天無一片雲萬里清如水孤月自空明我心亦如此

錢月齡 二首

月齡字鶴山無錫人居洞虛宮有丹丘漫藁俞汝

成云鶴山吳越王鏐二十一世孫吟亦成章
顧玄言云道人詩如盆涵魚藻小有幽致

花前

有酒當醉花前人莫教啼鳥傷殘春流光轉盼赴壑水
好花回首飛成塵請看自古繇華地年年惟見蓬蒿新
訪僧田舍

出郭尋僧舍青山隔水田扁舟孤墅入紅樹碧溪連菰
米炊香積茅茨帶夕烟相留無限意我亦愛逃禪

吳隱玄 一首

隱玄自號琴樂翁南昌鐵柱宮道士

漁父詞

扁舟一葉蘆花外短笛數聲楊柳陰隔浦樓高看不見
夜分何處得相尋

周休休 一首

休休正德間居建昌隆道觀

題院壁

陌上紅塵撲面飛近來覺得世情微白雲深處招黃鶴
不識人間有是非

汪麗陽 一首

麗陽鉛山人嘉靖初武夷接筍峰道士遺蛻葬
于石壁有野懷散藁

荅葉東林

柴扉終日對雲關何事游人興未闌一榻枕泉眠竹影
茶烟初歇鶴聲殘

林運素 一首

運素南都道士

登天壇

我覽圖經尋岳瀆東至太行入王屋崎嶇千里不敢辭
手策桃枝九節竹舉頭貪看華蓋峰驀然身入翠微谷
上方樓閣與雲齊金碧交光射林麓探奇直度瘦龍脊

千仞斷崖橫獨木虛皇之觀紫金堂絕勝洞天三十六
日精月華左右分黛色參天如削玉崖下飛流太乙泉
自是天關通地軸巡山使者持赤刀咫尺蛟宮誰敢黷
或聞仙犬吠仙燈或睹仙人跨仙鹿林泉處處愜予心
摒擋琴書將卜築藥櫃蔴籠春復春蟠桃畢竟何年熟

吳孺子 三首

孺子字少君金華人嘉隆間以黃冠游吳楚間
有吳少君集 鄒彥吉云山人雅好杜詩而其詩不專學杜外枯
中腴韻短意長詩不多作一歲不過二三十篇而已

詩話少君周游吳楚間留橋李獨久性至巧工于製器一瓢精絕過荆
溪為盜所擊王元美為作破瓢歌嘗婢白壁為竈名玉雪厨以白米置
冬春園中令微黃號樽香米一杖用綠萼枝條為之名紫玉杖最愛青
苔天新雨輒尋牆陰隨面得一苔磚必說人對客言每稱荀卿性惡之

說詩六卷沈嘉則趙汝師為作序鄒彥吉為作墓銘余仲房王伯穀為
作傳姚叔祥為述遺事均未嘗言其為道士獨顧玄言輯國雅目為黃
冠今從之

呂家曲水寄別錢懋毅

曲抱孤邨水長流斷岸陰借居方避地言別又沾襟客
久衰偏易鄉遙恨轉深把君書在手侵曉到如今

倚杖

貧病吾將老江湖度歲華艱難惟有淚飄泊更無家倚
杖慚歸鳥臨池惜落花秋風何太早瑟瑟向蒹葭

欲製羽衣

野服前年製羽衣今日無忽見白鷺鷥遠在青草湖

徐淵 二首

淵字湛虛一字月汀又字秋沙海鹽人萬曆中

棲真觀道士一作文始道院有水月軒臺

舟中

遠水浮高漢扁舟載夕暉人家隨岸斷沙鳥背帆飛旅况消村酒新寒戀布衣片雲何處起先我向南歸

書竹溪僧扇

寒玉千竿水一溪風光絕勝灑東西山僧定起不知午滿地綠陰沙鳥啼

吳道隆二首

道隆字易水桐城太霞宮道士有蟲吟潘蜀藻云易水居郭

西太霞宮崇禎末秦寇闖桐城宮毀會黃虎山將軍來援桐人德

虎山黃公祠二首

羽檄轅門至將軍不願生雷霆切下擊風雨但聞聲死賊退三舍生靈全一城至今遺老祀俎豆萬年情英雄經百戰忠勇實無雙浩氣今猶壯丹心矢不降虞淵爭墮日楚些哭長江薄暮鳥嗁急陰雲繞法幢

徐穎四首

穎字渭友更字巢友海鹽學生以誼誤逃于僧自楚歸入茅山為道士好談兵以徐鴻客姚廣孝自許後不知所終葛震甫云巢友詩不多作不苟作不為應酬之作

詩話巢友汗漫之游投軀嶺海其詩間入貝編雲笈之中拾孔翠一毛足勝凡鳥累百

宿何氏山居

日南氣多燠草樹冬未黃山行不山宿愛君溪上堂邨
居百事集異書探石倉香稻初脫杵嘉魚出寒塘旣觴
復就奕明月登我牀野田犬驚睡每吠燈燭光乃知靜
者意所遇皆故鄉

西嶽

拔地蓮花在多年玉井湮黃河西有影雲棧四無鄰冰
窟難成水楓香漸化人夕陽不易落間立數三秦

嚴陵

石几朝朝立鷺鷥苔檐露折野棠枝雙臺占得高千尺
不許他人下釣絲

古墓

草中斷碣先朝敕山下荒池舊祭田往往磨刀人上隴
石函掘得五銖錢

徐斗支

二首

斗支字梁父嘉興萬壽宮道士有蜀道嗟荆南

雜詠

敘州逢鄉客留飲

南溪古夔國信宿也相宜月白山當戶風輕水滿陂鳥
呼秦吉了藥咀五加皮萬里逢鄉客銜杯話所知

歸舟寄朱子蕃

春江自蜀來半是岷峨雪千里下江陵山山響鶻鳩

李延昱

十九首

延是初名彥貞字我生一字期叔後更今名改
字辰山上海人隱于醫晚居平湖佑聖宮自稱
道士有放鷗亭集

詩話辰山生長士族人不知其門閥策名仕版人不知其官資博綜圖
籍人不知其儲藏潔治酒肴人不知其庖饗所撰崇禎甲申錄南吳舊
話足以裨國史之采擇及疾革平居玩好一瓢一笠一琴一硯悉分贈
友朋而以儲書二千五百卷畀予誦其詩知為徐孝廉闇公之弟子然
其出處本末終莫得而詳也詩亦伯
仲幾社諸君入之黃冠中翹翹東楚

和陶飲酒詩

寄此一椽下日遭羣動喧我自飲吾酒勿覺日影偏終
身在城市仍不異雲山清風與明月有時相往還昨者
事已往今者又何言

齋中讀書

結廬西漾陂披雲攬丘壑絕塵自奔軌翰墨欣有託
言聊獨賞古人良可作非必琴酒娛頗得詩歌樂達生
貴知命引興在寥廓微陽明夕扉窈窕青山郭

蜜蜂投蛛網救之遭螫痛定後示道士閻風

天地孕萬物而各具殺機大小互為忍其事嘗因依蜘蛛
尤巧惡以坐而制飛蜜蜂翩翩來含芳昧所歸忽在
羅網中蛛喜逞其威但肆齒牙利不嫌軀體肥舉頭乍
見之手與解其圍蛛既患得失蜂詎解從違賈勇螫吾
手負痛心力微吾病蜂得生兒童任相非善且不可為
斯言識者希

緣溪行

瘦筇不老芒屨輕青錢三百隨我行溪橋數折入人境
日落更喜羣山青酒壚遙對菊花好東籬豈有陶淵明

中秋夜半對月

準擬中秋月歸來撥悶看星疎懸海嶠風細駐林端老
子興不淺清宵眠未安呼童重漉酒舊事話團圓

鉏草次張元岳孝廉韻

造化無私澤誅鉏有獨勞落花分徑闊迸筍出籬高滋
蔓非吾意爲螢任爾曹何如張仲蔚門外滿蓬蒿

永安湖送戴集之歸婺州

一片滄浪水南湖與北湖柴扉明落日漁艇暗春蒲聚
散當佳節悲歡屬老夫戴顓棲隱處風初滿長塗

慰孝先

東湖一片水喜汝暫停舟既有故人在能無十日留殘
花仍滴露新漲正浮鷗生計安垂白從人笑直鉤

偶成

早歲辭鄉國歸來鬢已華朔鴻乘雪起海燕受風斜興
起因鱸膾饑還倚蕨芽故交零落盡不敢歎無家

送邵漢甸歸蘭溪

屈指蘭溪路乘風四日程江聲欹枕急山色滿船輕汝
自謀行止人誰解送迎金華仙洞裏瑤草石臺生

上海

萬里朝宗水喧逐滬壘東稽天新漲碧浴日曉雲紅地

控三吳盡潮分兩浙通春申遺廟在社鼓賽村翁

憶亡兒漢徵

自汝云亡後蕭條恨不禁笑啼猶在眼出入總經心書
帙憑魚蠹琴囊任鼠侵徒將老年淚點滴透衣襟

羊叔子墓

叔子名垂久荒碑夕照多功還存俎豆意不在干戈烟
火三家市魚龍九曲河我來搔白首何事亦悲歌

過宣和嶺至義烏界追憶先師孝廉徐闇公先生
相期卜居處

聞說烏傷界前期似夢中四圍青嶂合一道白雲通棲
隱終難遂飄零轉易窮先生沒於湖州門生頭白盡無路哭遺蹤

古意

千金買綠綺一彈不再彈借問此何意欲言良獨難

半山聞鶯

一路籃輿穩山行日欲西藤花開未盡隨處有黃鸝

言別

夜值芭蕉雨時當鄩杜秋匆匆無一語相視上孤舟

大報恩寺別張南邨

垂柳絲絲挂夕陽百花春映遶迴塘他鄉杯酒前朝寺
一曲相看各斷腸

最憶

年年作客不歸家綠遍平蕪一望賒最憶竹堂西畔坐

茶烟吹過紫藤花

陳泓 二首

泓字白浮嘉興萬壽宮道士有榔梅居詩彙

寄鄭子擴

暇日相期蕭寺東別來三月已秋風朝來載鶴船人報
極浦芙蓉幾處紅

聞笛

塞垣高柳暮穆筆倚杖巡簷月已斜戍古無鄰霜易冷
莫教吹落小梅花

明詩綜卷八十九

